

表

賀祥瑞

賀捷

雜賀

文苑英華

五百六十一至五百七十

文苑英華卷第五百六十一

表九

賀祥瑞一

為西京百官賀老君見表一首 賀老人星見表五首

為汝南公賀彗星不見復正殿表一首

為成魏州賀瑞雪慶雲日抱戴表一首

為百僚賀雪表一首 為定王賀雪表一首

為納言姚壽等賀雪表一首 為宰相賀雪表一首

中書門下賀雪表三首 為京兆韋尹賀元日降雪表一首

為百官賀雨請復膳表一首 賀祈雨感應表一首

中書門下賀雨表六首 為宰相賀雨表三首

為西京百官賀老君見表 武后 崔融

臣某等文武官若干人言臣聞至德之運必有告聖之符
大道之行必有通一作靈之應故虞舜氏作五老出遊於

河渚周武勃興四神來朝於洛邑伏惟皇太后階下補天
爲盛配地居尊體國經野肇建惟新之業應天順人果得
非常之事伏見某日勅號州閩鄉縣界老君見并授鄔玄
宗語瞻一作然鶴首至哉龍德若遊渦水之年疑往流沙
之路叙皇威之有截論國祚之無疆道可以濟天下功可
以侔造化玄言妙鍵關令受教而先迷神理希微河公願
談而莫測方驗老人見於南極但謂承天黃人遊於後池
止云乘土固不可同年而議也臣等預睹嘉祥早參簪笏
惟神降福欣承帝系之隆惟德洞冥願奉玄元之慶無任
感悅之至謹附某奉表稱賀以聞

賀老人星見表

武后

武三思

臣守節等文武官九品已上四千八百四十一人上言臣
聞惟德動天必有非常之應惟神感既允屬會昌之期天

鑒孔明降休徵者所以宣天意神聰無昧効嘉祉者所以贊

神功故黃

一作赤

鳥白麟載稱姬漢之日玄圭黑玉式昭

禹湯之代伏惟天冊金輪聖神皇帝陛下潤色丕業光赫
寶祚執大象而御風雲鼓洪鑪而運寒燠浹洽四海輝華
六幽希代符來超今邁昔浪委波屬故合沓而無窮日轉
月見尚殷勤而未已伏見太史奏稱八月十九日夜有老
人星見臣等謹按黃帝占云老人星一名壽星色黃明見
則人主壽昌又按孫氏瑞應圖云王者承天則老人星臨其
國又春秋分候懸象文曜鏡云王者安靜則老人星見
常以秋分候之懸象著符於上人事發明於下壽昌者
知億載之有歸安靜者示萬邦之必附澄霞助月非唯
石氏之占散翼垂芒何獨斗樞之說臣等謬參纓笏叨目
禎祥慶抃之誠實倍殊品無任踴躍之至

同前 憲宗

揚憑

臣某言伏聞太史奏昨八月十五日夜壽星見奉勅宣付所司者伏以三光在天象以昭德一人御寓應運以發祥將後天而奉時遂瞻星而稱壽九重納慶萬國同歡中臣聞聖人握乾以繼統輔德以垂休則必焜耀耿光昭宣景福歷考圖諜皦然明徵謹接孫氏瑞應圖云老人星見人主壽昌陛下丕承寶歷光宅天下煥弘聖烈允執大中化成而天道不遠一作遠感至而星精介祉是以去歲已出今秋又見光靜而明當井絡之端色黃而潤斗中方之位降茲靈貺實契福庭帝圖表無疆之休史冊傳萬祀之慶臣生逢聖代幸觀昌期限以藩鎮守土不獲奔詣闕庭稱賀北望宸極倍萬恒情

同前 憲宗

令 狐楚

臣某言當道進奉院狀報司天臺奏八月某日乙亥夜老人星見於井東色黃明潤勅旨宜付所司者率土咸觀際天同慶中賀臣聞上天不言而星垂象次舍隱見其指甚明伏惟陛下道冠帝先恩覃物表大和之氣上達萬壽之瑞下呈既在井東又當秦分色侔蒸栗光掩連珠彰爾寶圖類堯年之河出延長聖歷齊漢代之山呼凡百臣下歡心如一況臣幸霑皇屬叨守國藩瞻望闕庭不勝慶抃之至

同前 憲宗

鄭權為定州張

臣某言臣聞惟德動天惟睿作聖既聖德格于上下故玄貺動于乾文天高聽卑應猶影響臣得上都進奏院狀報司天臺奏八月某日老人星見於井東色黃明潤大者臣謹按文耀鏡曰老人星見則主安又能氏瑞應圖曰王者承大得理則老人星臨其國中賀伏惟睿聖文武皇帝陛

下德邁勛華道侔覆載武以戡亂文以化成然猶肝食宵衣憂勤庶政今動植得所甯縣和平故上感網緼發瑞辰象色黃兆土德之有慶見并表聖年之無疆昭昭垂休上帝允答求諸簡冊光絕古今凡在億兆孰不歡抃臣限以祗守藩鎮不獲稱慶闕庭舞詠之誠倍萬恒品謹遣某官奉表陳賀以聞

同前

李商隱為榮陽公作

臣某言臣得本道進奏院狀報司天監李景亮奏八月六日寅時老人星見於南極其色黃明潤大者聖惟合德神實効祥必垂有爛之文以表無疆之祚臣某中賀臣聞玄象示人昊穹凝命曜為經而宿為紀則曰常名斗把酒而牛服箱或標虛稱未若候時而出有道則彰君五福之先在三辰之列伏惟皇帝陛下昭明老契游泳寰集作環集作戒集作式集作是中秋呈茲上瑞况見於午位又屬寅時仰考玄符

乃有深意自南耀彩將弘解愠之風近曉流光欲助無私之日皇心載裕靈鑒孔昭凡居率土之濱皆慶後天之壽臣誤蒙重寄實遠清光送玄鷲於梁間傷時自切望集作白榆於天上厥路無由賀聖戀恩無任蹈舞屏營之至

為汝南公賀彗星不見復正殿表 前人

臣某言得本州進奏院狀報今月某日夜彗星不見宰臣某等奉表稱賀請御正殿復常膳者天道甚密聖心不避感極而災亦為祥誠至而祇寧勝德臣某中賀臣聞殷湯以六事責躬止七年之旱宋景以一言修德退三舍之星歷代已來咎徵常有苟君能克己則禍不移人伏惟皇帝隣下寅奉丕圖恭臨大寶遵符列聖酌憲前王昨者天象之間星文稍異載深歸咎爰用覃恩倉箱集傳畢復於九年羅網併開其三面去營繕絕蕩心之巧申寬結除滅耳

之俘而又正殿不居太庖盡減精誠昭達懇惻敷聞芒焰
遽銷暑度如舊况蕞爾戎羯正犯疆場載思星見之徵恐
是滅集作虜亡之兆伏惟稍寬聖慮以擁皇休尊九廟之降
祥副兆人之欽屬臣又聞皇王之事業也雖至理之時不
遺於憂畏集作惕雖至和之氣不忘於將迎是故神農集勞
軒帝顛顛堯既癯瘠舜集作禹亦胼胝此四主側身於昔時
陛下用心於茲日千載符契萬方懷柔臣嘗忝內朝今居
近甸拱辰不及空瞻北極之尊就日無因忽覺長安之遠
唯知拊蹈莫可奮飛况時及初正禮當元會華夷畢至玉
帛皆陳小國行人外蕃下士皆得入趨鳳闕仰望獸樽臣
獨限關河坐營符竹戀既深而詞懇慶已極而涕零無任
感恩賀聖鬱戀屏營之至

為成魏州賀瑞雪慶雲日抱戴表

臣某言臣聞玄德上升三靈為之動色聖功下濟萬類所
以傾誠臣州去秋之間時雨不足自陽風應律子月驚年
今月十二日晚降雪越至十四日旦聞霽絮飛千里花翻
六出糝初梅而委苞封宿麥而垂津其日晡時西南奔慶
雲見為樓為閣圖閭闔之九重非錦非繡狀衣裳之五色其時
又有日抱戴日晚澄廓天景淑清拖黃氣而重圍舒
紅光而四溢臣與司馬樊玄則并寮屬吏等三十餘人得
所部貴鄉冠氏等縣申稱雪厚一尺以下并覩慶雲抱戴
等瑞臣謹按詩云上天同雲雨雪雰雰毛萇云豐年之冬
必有積雪汜勝之書云雪者五穀之精又按史記云慶雲
一名卿雲若煙非煙若雲非雲郁郁紛紛蕭索輪囷是謂
卿雲喜氣也瑞應圖曰景云者太平之應也一曰慶雲非
煙五色氤氳謂之景雲援神契云天子孝則景雲出游又按

援神契云王者德至於天則日抱戴在上曰戴在傍日
抱又云黃氣抱日輔臣納忠漢書曰宣重光李奇云太平
之代日抱重光伏惟陛下受天寶命冲用情深豐食之要
鑒寢憂勞雪爲五稼之精麥爲六田之首由是天降瑞雪
其意若曰太平其有年乎雲者運氣立名布恩成義陛下
恩霑草木惠及蟲魚揚祖宗之烈光垂天地之正色由是
天降雲瑞其意如若一作曰天子其大孝乎日者衆陽之宗
人君之表由是天降日瑞其意若曰天下其大明乎魏州
大名之慶基光封之舊國嘉祥備致靈既綢繆豈徒然哉
斯有由矣臣叨陪漢守肅奉堯親逢日月之貞明嘉煙雲
之爛熳手舞足蹈地雖限於外臺按謀披圖心已馳於雙
闕不任感悅之至

爲百寮賀雪表武后

李嶠

臣某等言臣聞至道充被而冲和感發玄化沉潛而祥物
昭應伏惟聖神皇帝陛下合德天地齊光日月陶正氣之
氤氳降元符之彤纓用能經緯六合驅馭百靈垂旒法宮
而品物清宴疑作景揆景中土而風雨休若三元肇革九陽
初動撞黃鍾而布氣順玄冥而率職曾陰候律豐澤順而時
蒼蔚方興起太山之膚寸參差荐委自平地而盈尺銅街
殆其如素金隄紛其遂滿縈樓樓檻疑壁臺之九重落絮
飄花似芳林之二月豈唯洛神呈象來舞帝宮故亦海騎
相趨下朝仙闕東臯欣而望歲南史慶而書祥萬寶登秋
居然可詠雙銅叶唱即事非遙自非著感通衢乾心輔德
何以降神靈之滋液發兆庶之歡慶臣等恭承玄造沐浴
太和欣聖澤之滂沛對天休而踴躍無任鳧藻之至諸詣
朝堂奉表陳賀以聞

為定王賀雪表 武后

前人

臣某言自涉隆冬頗虧甘液皇情睠佇聖德憂勤愍囹圄之罹憊念祈寒之在節爰發恩造親慮囚徒絲綉始行寒光已布德音纔降同雲便飛落絮飄花與新梅而競彩凝光吐艷共霄挂而連輝俄盈九域之中遍灑四瀛之外遂使狴牢式舞布霈澤於三大畎畝長歌佇豐年之一作萬庾報應之速固影響而無遠慶躍之私在臣妾而何極無任欣抃之至謹奉表陳賀以聞謹言

為納言姚壽等賀雪表 武后

前人

臣某言自玄冥授節素液未流宿爽翹滋陳根俟拔聖情迴睠天造曲成載想狴牢有矜幽滯方臨聽訟之觀且閱明刑之書中旨纔宣上玄俄應沛乎降澤油然而興雲凝瑞色於千里散禎祥於六出積素彌晝下集於瓊臺飄花滿空旁霑於玉樹海神奔走而來賀田畯謳吟而共舞靈心昭發事速於置郵聖意冥通有同於合契臣等謬當樞近親覲休祥抃躍之情實百忭品無任欣慶之至謹奉表陳賀以聞謹言

為宰相賀雪表

孫逖

臣某言臣伏見自冬已來雨澤微少雖春候尚遠未足為災而聖慮憂勤恐妨農事靈心允答瑞雪滂滂自昏達明已覩於盈尺無遠不及何止於千里既霑既溥足表西成之徵不疾不徐正符東作之候豈伊利澤更是殊祥臣等微生叨荷榮渥幸覩休慶空知抃舞無任欣躍之至謹奉表陳賀以聞

中書門下賀雪表 代宗

常衮

臣子儀等言臣聞聖人昭事以奉時乾道下濟以成物伏

惟寶應元聖文武皇帝陛下勤勞庶政憂濟萬邦念生靈之未康慮兵食之不足恭默寅畏齊于穆清減膳撤樂以祈玄造天人合應雨雪呈祥在登臺視朔之辰飄灑盈尺俯獻歲發生之節飛舞驚春太素混成浩然萬里甲子之瑞載表於昌期春秋所書亦先於農事重陰益固應水澤腹堅之時積潤潛通迎土膏脉起之候靈貺斯在豐年可知佇登來麩不假祈穀侍臣相慶野老同歡臣等謬奉中樞獲覩嘉慶無任抃躍之至謹奉表陳賀以聞臣子義等誠歡誠喜頌首頌首

同前 德宗

權德輿

臣某等言臣聞王者布令以時應天以實惟茲瑞雪用兆豐年伏惟陛下齋誠念人振廩恤隱同雲期兆集作宿麥可期以五穀播殖之精驗於農志當一陽發生之候助此

休徵感通不違朝野相賀臣等謬居近侍獲奉昌期無任欣抃踊躍之至謹奉表陳賀以聞臣某等誠歡誠喜頌首頌首謹言 貞元十四年十一月十日

同前 德宗

前人

臣某言臣聞天道下濟聖心上感以是訢合發為休徵惟茲雨雪之祥必稽時令之順伏惟皇帝陛下憂勞庶政勤憫蒸人鑒寐之間不忘於念慮賑恤之使相繼於道途膚寸興雲盈尺呈瑞以來麩之積潤為嗣歲之順成如京如坻百嘉可望既霑既足率土同歡臣等忝列侍臣倍百忻賀無任慶抃踴躍之至謹奉表陳賀以聞臣某等誠歡誠喜頌首頌首謹言 貞元十四年十一月二十日

為京兆韋伊賀元日降雪表

劉禹錫

臣某言伏以去冬以來久無雨雪臣於內殿親奉德音

以宿交未滋為虞以兆人生憂集作疾為念聖情所屬神理

潛通獻歲發春佳雪肇降當夷夏會同之日觀天人合應

之徵集作期迎喜氣於三光浹歡心於萬國癘一作疵永息

豐年集作阜可期臣以疾疹未平趨步有阻伏蒙恩貸已具

奏聞謹於光宅寺中勾當本務不獲隨例稱慶明庭既觀

嘉祥益彰聖德無任欣躍屏營之至

為百官賀雨請復膳表武后 崔融

臣某等文武官若干人言臣等聞太平之代天地合而流
津至德之時陰陽和而布澤所以三農滋殖百物阜安伏
惟天用金輪聖神皇帝陛下寶命網緼玄期膺纁包混元
而建極宅造化而開階德教布濩仁聲洋溢增高溢厚已
修中岳之儀順時班令更緝正陽之禮近以少愆甘澍親
發至誠懷宋景之一言採殷湯之六事德音纒降靈心允

協捧瑤緘而風起迎寶字而星流雲不崇朝覆三千之藥
草雨必以夜通百億之江河遍高下而同霑在公私而並
及陳留雨穀譬此非多櫟陽雨金方斯未重邦國延有年
之慶黎元罷望歲之憂臣等中賀伏願陛下凝神保和頤
性養壽復蠱庖之舊膳進鶴鼎之常羞使芝英有駐液之
期蓬莆知送涼之地則光天之下率土之濱孰不欣戴孰
不幸甚微臣等幸逢休運預沐恩波混虞獸而同歡比齊
禽而累抃無任悚荷之至謹詣朝堂奉表稱賀

賀祈雨感應表立宗 張說

臣某言臣聞水旱常數堯湯固有聖賢之理恭紱為難自
冬踰春積陽成亢陛下以時災繫政人患由君退巫女之
雩却鳳應龍之請陛下躬自暴露炎景瞻仰雲漢推心引讓
為人受咎誠既發而動天言尅期而降雨今已霖三日

澤涌重泉草樹含欣郊原變色加以雲平雨細氣潤風和
豈唯優渥王畿必將周遍天下羣心舒釋聖情開暢無任
萬姓歡悅之至謹奉表陳賀以聞

中書門下賀雨第一表代宗

常衮

臣某言臣一昨奏對親承聖旨以旬期少優春雨未降雖
去冬積雪宿麥頗滋閏年之候農耕未晚甫當薦鮪之月
爰及禁火之辰紫陌揚塵青郊晦色日勞聖念恐失人時
處於龍堂親行齋禱德音朝發甘澤夕零霖霖散於城池
芳菲遍於草樹四遠皆浹羣情共歡昔在聖人祭則受福
必以情意通於神祇伏見陛下每發聖心未嘗無應其天
合德所感昭然慶悅之深倍萬恒品無任

第二表代宗

前人

臣等言臣聞王者應天以實禮神以誠則其祥大來所應

必速伏惟寶應元聖文武皇帝陛下端命上帝陰隲下人

大哉洋洋發育萬物一風一雨必輕疑作於憂勞惟精惟

微久存於濟禱自立春之後膏澤頗滋宿麥方蘇首種不

入百穀皆賤羣黎稍安屬盛德在火之辰恐散陽流輝之

亢小憇旬候則失人時及命尹京載明祀典飭三輔之屬

吏修百縣之大雩陛下又於龍祠躬自祈請雖田事未廢

而皇清過勤意纔發而氣蒸令始降而雲合寧止西郊之

密且有南山之躋霈然時行丕冒海表浹辰而霽更悅羣

心擢芒之蕃將豐於夏薦流根之潤佇合於秋成固使我

倉如陵萬億及秭軍國是賴朝野同歡多福殊休莫盛於

此臣等謬塵樞近喜倍恒情無任慶抃之至

第三表代宗

前人

臣某言臣聞春秋龍見而雩以其盛德在火萬物炳然陽

驕而旱也周禮所以修一縣之大祀命三公以不郊則知
古之勤雨首於是月蓋聖人順天以垂訓王者奉時而告
虔伏惟寶應元聖文武皇帝陛下憂勤庶政寅畏上玄全
萬物而曲成恐一夫之不獲嘉生是降率土皆穰又自春
已來膏澤相繼禾方長茂猶潤纖莖麥且耀芒仍涵秀色
及純陽用事流輝是憂未失旬期已勞聖慮勉農祈穀合
樂圓丘感上帝之儲社顧倉生之稹福祭之明日夜合層
雲微風既和震電一作雷不作霽然四合滂灑終朝動乾坤
而滿盈洽陰陽之化育郊原益茂田穉皆登俯觀秋至之
收佇廣歲成之望自朝及野咸慶時和比有鼓腹空迷日
用臣謬參衮職久荷鴻私仰聖澤之無涯愧生成之未答
無任躍之至謹奉表陳賀以聞

中書門下賀雨表

權德輿

臣某言臣聞王者以誠愛人以德動天則文感不違庶徵
時序頃自春澤愆候上軫皇情恊用五紀憂勤六事暨純
陽之節雩禱是脩齋心勞慮恤隱卜宥過雲觸石而興潤月
離畢以呈祥南畝就功西成可望含舖鼓腹幼艾相觀集作
見聖人之化育符上帝之陰隲臣等忝列台司喜萬恒品
無任慶抃踴躍之至謹奉表陳賀以聞

貞元十三年四月十一日

同前

前人

臣某等言百穀所仰甘雨是資三務成功望歲斯切雖閏
候頗晚農耕未遲而特澤稍集作小愆皇所軫齋禱上應情
集作陰陽以和處興有滄之潤方茂如茨之稼况霖霖未
已公私必均叶聖造之休徵副玄功之育物臣等職叨樞
近喜萬恒情無任欣賀踴集作躍之至謹奉表陳賀以聞
臣某等誠皇誠恐頓首頓首謹言

貞元十四年四月十七日

同前

前人

臣某等言臣聞聖人之德與天地合則廣徵特若生類招
蘇伏惟陛下慈愛元元統御燁作萬物憂在稼穡切於登成
慮甘澤之愆期憫蒸人之望歲誠之所感天且不違有
滄而與觀一夕之霑洽大田相慶知百穀之阜蕃農夫克
敏秀穎皆實藎集作筮就緒倉箱可期遠邇通幼艾忻懽鼓舞
臣等謬當近侍喜萬恒情無任喜抃踴躍之至謹奉表
陳賀以聞臣某等頓首頓首謹言

貞元十七年七月十四日

為宰相賀雨表

孫逖

臣等今日見高力士伏承陛下以春雨暫愆皇慈軫念特
紆鳳輦俯詣龍池祝之以聖言誥之以神理靈歆允答膏
澤遂盈速若影響合如符契則知聰明之德與乾道而潛
通變化之功隨聖情而廣運殊祥昭著不應難名在於微

臣倍深慶悅伏望宣付國史以揚天休無任抃躍之至謹
奉表陳賀以聞

同前

前人

臣某言臣等伏見近者微旱聖情勤勞躬徇物情修禱祀
於神明焦思憂人罷歡宴於良節精誠懇至上應玄通果
叶休徵遂成膏雨植物皆潤已霑霖霖之恩陰雲上多終
致滂沱之澤三農有慶萬國寓一作同歡臣等職在燮和效
無涓滴久勞聖慮責且重於丘山幸遇甘霖恩實濃於草
木無任欣慶之至謹奉表陳賀以聞

同前

錢珣

臣某等今日某日京兆府奏降雨分寸者伏以頃屬時雨
稍愆聖慮憂軫尋舉祀典用禱玄功臣聞廣覆無親明德
是輔誠之所感天則不高仲春已來驕陽頗熾宵旰勞念生

靈具知部樂空懸常羞盡滅處陳牲玉並走山川况便殿
坐朝深形憂色不責輔臣之咎恐貽赤子之心區橐籥之間
神祇咸聽既有升聞之實寧無昭報之期是以愛雲隼忽興
蜿蜒遂作固得遠踰關輔匪獨周布郊圻君心動天歲有
成於登麥臣雖充位力不足於為霖空喜沍滂敢言燮理
甫田皆潤沍氣全銷信可待於豐穰更何求於符瑞臣等
無任賀聖欣躍抃舞之至

文苑英華卷第五百六十一

登仕郎胡

柯

鄉貢進士彭

叔夏

校正

文苑英華卷第五百六十二

表十

賀祥瑞二

賀太陽當虧不虧表一首 中書門下賀日當蝕不蝕表首

賀歲除日太陽不虧表一首 賀洪州慶雲見表一首

百寮賀日抱戴慶雲見表一首

百寮賀我逆人王慈愆後慶雲見表一首

為涇州李刺史賀慶雲見表一首 扶風郡賀慶雲見表首

賀祥雲見表一首

為宰相賀平原郡鑄尊容鑪上有紫雲等瑞表一首

為宰相賀開元觀鑄聖容慶雲見表一首

為宰相賀會昌山慶雲見表一首

為宰相賀賽龍潭有瑞雲表一首

為宰相賀中岳合鍊處藥自成兼有瑞雲見表一首

為宰相賀太原府聖容樣至有慶雲見表一首

中書門下賀慶雲見表一首

中書門下賀太原紫雲見表一首

為皇太子賀甘露表一首

為百官賀斷獄甘露降表一首

賀萬年縣甘露表一首

為百官賀舒州甘露表一首

賀甘露表一首

中書門下賀元和殿甘露降表一首

賀太陽當虧不虧表代宗

獨孤及大曆十三年

臣等言伏見今月一日雲物陰晦太陽當虧不虧者臣聞

殷太戊宋景公皆脩德立言而妖變為福陛下以日月薄

蝕勞謙惕厲而災不勝德雲為垂陰若天降衷使其謫故

集無故字不見易象曰既憂之咎不長也臣等無任慶戴之至

中書門下賀日當蝕不蝕表代宗

常袞大曆十三年

臣某言伏見徐承嗣奏今月一日法當日蝕時有澍雨者

後

臣聞日之所躔行有虛道至之所會蝕亦無災况聖以合

天德以禔福是有幽贊且於感通伏惟寶應元聖文武皇

帝陛下協用五紀順用三極曆象日月統和陰陽一有行

之度六字迴開迺者疇人推策合朔於辰非正陽之所忌於大明

而何損猶能懼而勤政實以應天齋于穆清益用恭默精

誠所達玄運相符園尺之影始生於海上膚寸之雲忽遍

於天下霈然而起豈止中朝莫測應龍之升潛復踐鳥之

次伐鼓救弊悉罷於有司潤物蕃生普歡於在野及乎宿

霽更益清光同道相過則聞昭子疑當作梓慎之對當交

更變果銜劉邵之言古今殊祥中外所慶臣等謬陪近侍

喜萬恒情無任抃蹈謹表

賀歲除日太陽不虧表

臣聞惟德動天其應如響日月交會數之常也交而不蝕

德所感也伏見有司奏今日午正後七刻太陽初虧未正
後三刻腹滿者是日也高天無雲太陽不掩訖于申酉光
彩逾明萬寓同霑百神叶慶賀中伏以聖人者合天地以爲
德與日月以為明當虧而不虧明足見矣當應而遂應神
不欺矣伏惟陛下德本於孝動由於禮勤儉以厚下寬仁
以愛人憂庶政而疾懷求衆善如不及行之於下土升聞
于上帝無遠不屆感而遂通一人有慶三光應祉昔黃虞
至化而星辰不孛日月不蝕以今方古千載同時况大禮
元臣在於明發俯逼惟新之運彌彰不掩之祥人事天心
何其允叶清輝散彩愈耀於朱城麗景臨空轉明於黃道
凡在生類同知聖猷無任踴躍之至

賀洪州慶雲見表太宗

許敬宗

臣某等言臣聞靈心不測叶至道以升聞上帝無聲候休

明而降祉同夫影響在感斯通相彼天心實交其際伏惟
皇帝陛下重光御極體睿凝圖始自憂勤寧羣飛於海外
賜之仁壽拯塗地於寰中摠絕代之英聲實興爲之聖政
三秦咸泰六府斯歌首冠往初功無取譬德澤共二儀潛
運清明與七耀齊光是以邇無不安遠無不屆雕題鏤首
之類款郊甸以相趨趨藹裘板屋之酋入提封而請吏上騰
下漏天平地城嘉一作喜氣內充卿雲以之舒彩盛德外發非
煙由其散色竊見守洪州長史張惟善一有悟等稱以六
月二十六日於城內見慶雲自旦及申然後方散謹按瑞
應圖曰慶雲者太平之應孝經援神契曰德至山陵則景
慶一作雲出又曰天子孝則慶雲見金枝玉葉若臨軒帝之營
蕭索氤氳復入唐臣之詠自非工倖造化道格上玄光含
六幽恩流四海安能致茲神感式彰靈貺玄黃間紫朱起

相輝千載合符如斯之盛也雖復駢技合穎正此為輕絳
雪玄霜曾何足喻凡諸率土預在宵形沐浴皇風用深亮
藻況以臣等謬忝衣簪且夕巖廊親聞錫瑞相乎抃躍實
百常情不勝悅豫之至

百寮賀日抱戴慶雲見表武后

李嶠

臣某等言臣聞大人造物亨衢所以貞觀上帝縣象曾穹
所以照臨合其德而先後不違契其誠而表裏潛應伏惟
聖母神皇陛下仰膺顧託俯順謳歌臨天下之大寶當感
中之正氣斟酌律三神援亭壽之權鼓舞陰陽萬象入
財成之契六幽金鏡四時玉燭凱澤將膏雨共流協氣與
景風曠暢故能使天地儲祉靈祇降神樞紐薦符句芒錫
壽自呈疑命洛書肇出惟宗社之饗德迪神明之祚聖
象物昭應休澍煥發每至十二月玄珉啓匣綠錯披題遷

寶秘於東序視衣纓於北闕必有仙鶴翔集雲鳥杲曜祥
光入於九重異氣懸於三象雖復鼎來汾水黃雲冠於北
山劔在豐城紫氣衝於南斗無以方斯影響近此天
作符籙動而有徵日考驗以為常準日在朔月時惟孟
秋奉鴻休而正位先告辰而解網休日辛酉衆姬稱賀申
禮既畢詔示聖圖芝檢初開扶光未徙即有氤氳傳漢發祥
於僂仰之間蕭索浮天舒彩於折旋之際于時睟容當宁
嬪儀在列文物充於紫庭暉光察於玄象或抱或戴洪
環之威儀非烟非雲奪禕榆之彩色兩宮胥拊六妃式舞
欣就望之近臨悅光靈之下濟臣等謹按孝經援神契王
者德至於天則日抱戴又黃氣抱日輔臣納忠瑞應圖曰
天子孝則慶雲出又曰天下太平慶雲見陛下宵衣旰食
至德通於九玄皇帝錫類推恩純孝形於八表惟明永道

若金在礪自物觀化如草從風屬千齡之景業承肆肯之
鴻霈乾坤合而喜氣生圖錄啓而禎符作旣以發揮天德
昭寶運之隆平且以光翼端章究靈心之絳始自非上下
和洽幽明薦成何以微疑作造化之神偉合天人之符契
昔者玄珪受命無疑感召之祥赤土披圖不發昭回之旣故
知冥祇戢道曆載祀而潛休靈物俟時當聖明而効用事
超六籍之外聲高百王之表卓哉至矣無得而稱臣等謬
奉隆知親承大慶朝聞夕死每竊抃於昌期手舞足蹈敢
稱歡於下列無任鳧藻踴躍之謹至詣闕表奉陳賀以聞

百寮賀戮逆人王慈徵後慶雲見表 前人

臣某等言伏見今月十一日誅反逆王慈徵等乃有慶雲
見於申未之間蕭索滿空氣氲蔽日五彩畢備萬人同仰
伏以慈衝等並典司戎旅出入禁闈反德亂常皆天逆理

聖靈感通神祇昭應雖逆節始萌而潛謀必兆窮姦回之
密計盡苞藏之巨慝並膏斧鑕俱肆朝市五屬明啓嚴刑
應於九秋萬寓悅豫嘉氣呈於三象此實天人合德宗社
降休欣紫宸之永固在蒼生而知幸無任嘉慶之至謹拜
表稱賀以聞

爲涇州李刺史賀慶雲表

崔融

臣某言伏奉詔書上御武 殿有慶雲映日見於辰巳之間
肅奉休衝不勝抃躍中賀臣聞諸瑞應圖曰天下太平則慶
雲見天子大孝則慶雲見伏惟皇帝陛下早朝晏坐憂勞
庶政遠無不肅邇無不懷神感潛通至誠上格涼秋中月
滯雨移旬天必合而喜氣生陽德動而愁陰歇文章郁郁
惠日照而成彩花薦蓬蓬晴風搖而不散雖復紫雲來漢
皇殿白雲入殿帝房校其優劣疇以爲喻臣運奉休明榮

需刺舉千年多幸已逢河水之清百辟相歡重悒叢雲之曲不任悚踴之至謹遣某官奉表稱慶以聞

扶風郡賀慶雲見表 玄宗

楊譚

臣某言臣聞休徵所應克昭明聖之期靈既攸歸必會昇平之運伏惟開元天寶聖文神武皇帝陛下發揮真宰撫育道樞致妙用於希夷納蒼生於仁壽故得風雲効祉動植呈祥臣所管內雍州界天柱山頃有玄宗皇帝古宮考時代而罔知覩寂寞而如在今月十四日辛丑皇姝持盈守法於宮前紫虛觀中齋心伏形為陛下祈福忽有慶雲照曜施五彩於山巔喜氣紛綸散重光於宮下其日從巳時至未時官吏僧道瞻顧彌遠陛下續玄元之仙籙授天寶之禎符千古未聞百靈何幸克叶天意必因人心表陛下無疆之福明陛下無疆之壽臣忝守方岳寄重分憂抃躍之

誠倍百恒品謹寫圖奏以聞特望天恩宣示中外以光史策天下幸甚天下幸甚臣某誠歡誠喜頓首頓首

賀祥雲見表 玄宗

張九齡

臣某等伏見道門威儀司馬秀表稱今日日夜陛下親臨同明殿道場為宗廟蒼生祈福有祥雲見伏以聖德以精至動天天意以盼嚮符聖其應集作甚速豈遠陛下孝聖集作敬之深勤恤所至靈心如答神道何言其應自表休期以介景福生人大賴天下幸甚臣等忝居近侍倍百恒情謹奉表稱賀以聞

為宰相賀平原郡鑄尊容鑪上有紫雲等

瑞表 玄宗

孫越

臣等伏見平原郡奏去月七日鑄尊容鑪上有紫雲如蓋高三尺餘鑪畢方散煙焰中又依稀有一老人鬚皓白俯

臨鑄上并繞鑪行道時聞空中傳億萬聲及鑄畢啓摸相
好圓漏面有自然之金色者聖心通感至道炳靈洪鑪未
開殊祥累見蓋呈祥瑞相表金光烈火之中式瞻仙老無
聲之地忽聽神言在前古而未聞不崇朝而荐至稠疊之
慶名言所難况肇自京師至于郡國真容所鑄靈應必臻
神妙無方用彰於聖壽生靈何幸永覩於昌期臣等忝居
近侍倍深欣慶無任抃踴之至謹奉表陳賀以聞

為宰相賀開元觀鑄聖容慶雲見表玄宗前人

臣等伏見開元觀先請今月十八日鑄聖容昨夜先期普
天降雨暎明展事萬里無雲及寫之際又有卿雲休氣氤
氲扶日道俗咸覩移時不散伏以聖惟不測有感而必通
天則無言觸類而成應陛下欽崇至道子惠蒼生爰寫尊
容將弘介福故得天地合氣神靈布和甘澤而達曙已晴

綵雲而抱日呈瑞鎔範之際殊祥畢集寔表聖明之感更
彰仁壽之期臣等忝在掖垣不勝大慶無任悅豫之至

為宰相賀會昌山慶雲見表玄宗前人

臣某言臣等今日伏退後伏見會昌山上有五色雲見紅
翠稠疊光彩相鮮爛若藻繪積如山岳近依湯井俯俛宸
居移時不散從臣咸覩伏以雲物變態真仙所憑法駕繞
上祥光已見豈唯天地合氣以表於和平固亦神靈告休
用彰於聖壽無任抃躍之至謹奉表稱賀以聞

為宰相賀賽龍潭有瑞雲表玄宗前人

臣某言適內謁者監牛仙童至奉宣旨先為蒼生祈雨
今日告賽不生明日亦脩疑不生者涼秋已來時雨未降陸
下憂勤兆庶躬自祈禱甘澤溥洽又陳昭報親紆鳳輦俯詣
龍堂御膳撒鮮齋宮致潔亦既累日方申大祭禮畢之

後更祝龍潭終發德音已臻不應仙童云其時即有青紫雲自潭而起爛熳呈祥烟煴布和勢騰晴空光映秋水即知飛龍之德變化無方聖人之感深微莫測惟茲靈貺實謂殊常臣等特荷恩榮倍增欣慶伏望宣示朝列兼付史官用垂明徵永昭盛德無任慶抃之至謹奉表陳賀以聞

為宰相賀中岳合鍊處藥自成兼有瑞雲

見表

前人

臣某言臣等伏見道士孫太冲奏事奉進止令中使薛履言監臣於中岳嵩陽觀合鍊其竈中着水置炭於竈側對三却迴已經數月泥拭既密絨封並全即與縣官等對開門其炭並盡灰又別聚不動人力其藥已成初乃五色發端終則太陽暉於鑪際又河南裴敦復所奏并奉勅令右補闕李成式往驗並同者臣聞神變無方式昭於幽贊聖

心有感必驗於玄通陛下至德奉天精成契道動無不應事若合符故得鍊藥之所瑞雲先見丹鑪不爨金液自成太陽降精宜假於人火飛廉扇炭諒關於神力殊祥特異曠古未聞靈跡既彰用資於聖壽群生何幸永觀於昌期況在微臣實倍常品無任抃躍之至謹奉表陳賀以聞

為宰相賀太原府聖容樣至有慶雲見表

玄宗
前人

臣等伏見太原尹韋齊奏今日四日紫極宮玉石聖容樣至北京其時有慶雲垂天自辰至巳輪囷紛郁萬姓咸觀者伏以雲物呈瑞神仙効靈豈伊天地之和更是壽昌之慶況太原舊國王業所興聖容終及於近郊卿霽已彰於合契氤氳五色變汾水之白雲隱映三清類函關之紫氣上玄感通品物同歡况在微臣倍深慶曰無任抃躍之至

中書門下賀慶雲見表

代宗

常衮

臣某言伏見太史奏今月十三日降誕之辰有慶雲見自
卯及巳五色相暉京城士庶無不觀覩者臣聞應天者聖
降必有期從龍者雲感而成瑞伏惟寶應元聖文武皇帝
陛下啓我昌運本乎太微甲觀盡堂以書有慶赤光紫氣
以表祥符每歲孟東內朝舉禮萬國稱賀郡臣獻壽紛委
靈貺摠集良辰今者卿雲表祥史冊十月良月遠膺盈數
之期後天奉天近叶下元之曆從風蕭索抱日榮迴色涵
流渚之虹影雜繞樞之電交映榮光曲成轉蓋萬物皆覩
羣情共歡無疆之休永永禔福臣奉觴慶瑞於萬斯年無
任抃躍謹奉表陳賀以聞

中書門下賀太原紫雲見表

前人

臣等言伏見太原尹北都留守檢校工部上書薛兼訓奏
忻州七聖廟內尊容奉勅移太原府紫微宮安置昨正月

二十九日啓告其時有紫雲見兼全奏之聲者臣聞廟貌
尊嚴所以追孝天地明察則必垂祥伏惟皇帝陛下全聖
人之至德合神道之設教受天之命嚴龔奉先明發有懷
載感於文武菲食至美必誠於宗廟序五位而禮順刑四
海而化光大疑以聖靈在天緬慕增場是有象設不忘哀矜
永念興王之地如聞樂沛之言遠自方州遷於京邑克配
上帝高居紫微當其撰告之時爰有奏章之請百福紛委
萬靈朝拜雲浮瑞色樂協薰風已含氣於潛龍更和響於
翔鳳用彰莫大之孝以嗣無疆之曆雖周室之既受多祉
漢朝之屢獲嘉應未有祖禰丕祐天人合符若斯之盛也
臣無裨政事但慶鴻休不勝抃躍之至謹奉表稱賀以聞
為皇太子賀甘露表 高宗 崔融

臣某言甚至伏承某月日甘露降於金闕亭肅奉休徵不

勝抃躍中臣聞五材並用天地合而凝津四序遠來陰陽和而灑潤望之成雪若墜崑崙之山嘗之則甘以降軒轅之國伏惟天皇部元氣平太隣正圭表於都畿考銅欄於宮室薦河圖而升洛範日載一作祥編過竹苑而息芝臺宵零瑞液爾其塗塗被物滴滴流膏承以玉椀凌漢宮而擅美獻之瓊爵掩魏殿而猶瓊可以致靈仙之奇可以延帝王之壽孝經援神契未足叙其和平春秋運斗樞不能議其清濁臣濫膺國本多慙人望仰宸遊而不及倍戀恒情聞帝澤而先驚慶深常位無任喜抃之至謹遣某官某奉表陳賀以聞

為百官賀斷獄甘露降表武后前人

臣某等文武百官若干人言一昨伏見御史中丞吉頊稱某日承制推法司用斷事惡逆者會赦不免謀反者會赦

從流主上以為輕重不當陷入入罪制曰君親無將將而必誅安有忠孝同極而流罪貫若此者豈欽恤之意耶旋命主司奏上沿革謹按貞觀律唯有十卷其捕亡斷獄兩卷乃是永徽二年長孫無忌等奏如果非庭監所制百寮蒙瞽一朝開鑿聖玄通有知影響自發德音之後每夜觸處有甘露降者臣等中臣等聞刑罰者人之鞭策號令者國之舟車所以懲惡止姦輔政助化故軒轅之為君也設法而天下安樂陶唐之為帝也察令而天下昭明然則不令而誅不教而殺是虐人也法不勝姦刑不制罪是陷人也有以知懸之象魏布以都鄙是謂禁人為非銘之鍾鼎鑄之金石是謂丕天之勳為人上者可不務乎若乃前主所是疏為律後主所是疏為令事有不合於古不務於特則弛而更張矯以歸正正朔三而改文質奪而復王

禮不相襲帝樂不相沿夫何為乎亦云適時而已伏惟天
用金輪聖神皇帝陛下躬明哲之性秉淑聖之姿順風雨
以發生乘雷電以震耀推功天地所以告成太室致孝祖
考所以宗祀明堂陳寶鼎於庑庭正土圭於王邑能事畢
頌聲興寃積之氣不彰刑殘之尸復育斷獄四百逾鑿寐
於淳源科條三千尚劬勞於畫象日者有司奏牘議不事
明大聖當樞因一作人軫慮但臣之事主猶子之事親父子
則身體髮膚君臣則股肱元首出忠入孝義在俱全履霜
鑿冰法無異罰曲禮垂教子處澆宮之條大傳立文臣從
渚室之坐何繇終經赦宥頃隔刑書反逆首條而遂生惡
逆未坐而猶死下上箝履顛倒衣裳遂使吏生涯巧人無
常禁逆節所以時萌凶黨由其或在夫立殺止殺制刑息
刑重其死然後生峻其法然後禁禮以齊君子刑以齊小人非

唯聞義而輸忠固亦知教而遷善斷彫為樸自然登至道之
初墨幪赭衣何必獨上皇之代銓也法也念茲在茲昔者仲尼
修春秋亂臣賊子懼梁靖撰七序竊位素餐慙况我大君
財成上聖制作昭昭焉若日月之代明纍纍焉似星辰之
錯行有典有則是彛是訓懷生幸生而有餘群下瞻仰而
不足蕭相國捃摭秦法窺天無階杜武庫參定漢章踏地
失措誠可以垂後誠可以達幽至人無心靈契昭於玄極
昊天有命神物萃於休期異風未行甘露頰降亦何止言
善而星退躬禱而雲來夫其素液繁灑芳滋豐溢叢駢六
氣之英搖動二儀之粹匝園林而並潤溥郡邑而同霑漢
宮無假於玉在魏殿不勞於瓊爵臣等謹按甘露者美露
也一名膏露一名天酒其凝如脂其甘如飴蓋神靈之精
仁瑞之澤稽命徵云稱謚正名則葦竹受甘露孫氏圖云

王者和氣茂則降於草木食之壽援神契云天子刑于四海德洞淪冥則甘露降鵝冠子云聖人之德上及太清下及太寧中及萬靈則膏露下白武通云甘露之降則百物無不盛也陛下俯迴冲眇親定律文必也正名果符稽命是使孟堅持論談功德而未詳抱朴裁書稱太平而不盡上可以輔聖躬之壽下可以延庶物之和言之動天一至於是臣等庇廕昌運接景清朝常勉志於克家每勤誠於報國恭聞大典伏覽殊祥臣知拱極之尊子識晞陽之慶無任抃躍之至謹詣朝堂奉表稱賀以聞仍請宣付所司頒告遐邇

賀萬年縣甘露表 代宗

前人

臣某言今日中使吳永清宣示臣萬年縣靖恭坊南街柳樹上降甘露者臣聞玄元皇帝有言曰天地相合以降甘

露伏惟寶應元聖文武皇帝陛下事天明事地察所以受三靈之景貺叶萬國之歡心其在陽不晞被葉增固且滋且繁如脂如飴神明有以告祥蒼翠因而不改則顯元之氣不浹於人軒轅之精不愛其寶俾太平之瑞呈上陌之中況地即萬年時當子月不憊寒冱實表靈長禎符荐臻壽域何遠以之興運在陶唐而則然特用紀元於大漢而無愧伏望宣付史館永播休徵臣謬承雨露之恩愧無涓滴之助不任云云

為百官賀舒州甘露表

崔元翰

臣某等言伏見舒州奏懷寧縣界天柱山東南谷寺降甘露今月五日下午尚書省者臣等謹按皇王已來圖諫所載皆以為天地之合神靈之精感中和之茂育彰太清之至理故鵝冠子曰聖人之德上及太清下及太寧中及萬靈

則甘露下禮曰天不愛其道地不愛其寶則甘露降伏惟
皇帝陛下玄化醇茂沐澤汪洋合覆燾持載之功配高明
博厚之德恩加羣物禮及百神可謂同符實如前載又據
舒州刺史宇文適所奏云天柱山者柱石之象也表山岳
之靈懷寧縣者表懷柔之理伏以遠夷懷惠輔臣納忠觀
其所言信而有說臣等親聞聖政獲覩殊祥無任

賀甘露表

武元衡

臣某言伏奉今日九日聖恩以元和殿前所降甘露宣示
百寮者伏聞聖德至而和風應元氣滋而靈液降不有上
瑞曷彰盛時况甘惟旨味露則仁澤豈無外野故呈祥
于中禁不於別殿特表慶於元和光凝棲鳳之林氣浥傳
香之樹將使五靈集社卉葉流芳伏惟陛下先天奉時王
道立極不言而風雨咸若無爲而禎祥荐至故得蒸雲降
液觀陽不晞如脂如飴珠連星綴可以彰聖感可以保豐
年漢致金盤魏稱瓊爵方茲冥既固有懃德臣遇私鴻造
幸偶昌期希代珎符爲生畢觀載欣載賀徒竭犬馬之誠
舞之詠之共樂華胥之俗無任

中書門下賀元和殿甘露降表

德宗

權德輿

臣某等言中使某已至奉宣進止示臣等元和殿今日甘
露降於桐樹丁香樹者謹按孝經援神契曰王者德至天
則甘露降孫氏瑞應圖曰王者和氣茂則降於草木伏惟
陛下聖德感通殊祥允集當長贏之月下順人心降穆清
之中上昭天意太和陰騰靈液瀦滋屑玉綴珠溥集作枝
滋葉質同雪白味若飴甘灑珎木以相鮮激繁香而合發
雖軒丘領瑞漢史紀年徒習前聞豈如目覩此皆至誠旁
及集作協天休合符凡在懷生不勝大慶臣等謬居樞近

倍萬歡誠無任欣抃踴躍之至謹奉表陳賀以聞
貞元十八年五月十八日
此卷英華所編不依年代先後今正之

文苑英華卷第五百六十二

登仕郎胡柯 鄉貢進士彭叔夏 校正

文苑英華卷第五百六十三

賀祥瑞三

賀連理樹表一首 皇太子賀瑞木表一首

為納言姚璿等賀瑞桃表一首 為宰相賀連理木表一首

為宰相賀李樹陵冬結實表一首 中書門下賀許州連理棠樹表一首

皇太子賀芝草表二首 為宰相賀合鍊院產芝草表一首

代百官賀芝草表一首 中書門下賀芝草嘉禾表一首

中書門下賀芝草表一首 皇太子賀嘉麥表一首

中書門下賀恒州草州嘉禾合穗表一首

賀嘉禾表一首 為百官賀千葉瑞蓮表一首

中書門下賀神龍寺渠中瑞蓮表一首

賀西內嘉蓮表二首 為百寮賀瑞筍表一首

為朝官及岳牧賀慈竹再生表一首

賀連理棠樹合歡瓜白兔表一首

賀連理樹表

閻丘均

臣聞靈氣所化恒起於無形祥跡所憑名屬於聖日雖微物之成象國王者之名徵臣所部官圓中有李樹質茂宗生意標恒類交枝兩出其理三連綠葉密而泛煙白花糝而似雪觀希於即事此句知者稱瑞當今星精下流天意玄寄往一作嘉圖誰載休徵莫儔昔上林樹生中興劉氏推神議物我則居多臣謬齒勞疑章慙名首席欣逢遇數竊躍昌期

皇太子賀瑞木表 高宗

崔融

臣某言臣聞惟德動天無遠而不格惟神感物有來而必應伏惟天皇提乾象運斗極載黃屋而臨太階正紫宮而開別室伏見某官奏箱石門元谷內玉山宮側秋水一昨暴長漂水三萬餘根林衡悚迫匠人驚視仙桂來於月中

靈查下於天上昔開陽門之肇建飛柱潛移太極殿之初營浮梁遠至論其壯觀猶尺蠶之窺尋木喻以皇家若牛泔之望鼇海方見陵雲之構匪日而成負黼裳而朝百神垂衣裳而會萬國盛矣美矣輪焉奐焉臣德謝元良濫膺儲貳寢門來謁常取候於鳴雞大厦既成竊自歡於賀雀不任鳧藻之至謹遣其官其奉表稱賀

為納言姚壽等賀瑞桃表

李嶠

臣某等言伏見內出靈桃四實共同一蒂禁園芳果仙庭竒樹名珍杏柰族茂櫻胡鮮花發於上春嘉實成於早夏因而為一表四表之一君異而為同明異方之同貫漢宮留核曾所未窺衛國報何能竊似殊祥靈應疊既駢稭凡在見聞孰不歡躍臣等謬當樞近累覲休符喜抃之情實萬恒品無任欣慶之至謹奉表陳賀以聞

為宰相賀連理木表

常袞

臣言今月二十六日得太清宮道士陳岳等狀稱聖祖殿院東廊九靈門北有柰樹連理異枝還合者臣按漢武元狩元年得奇木枝旁出輒後數日越地及匈奴率衆來降者中興書云王者德澤純洽八方大同則木連理伏惟皇帝陛下體元以臨寶位法道以御太和孝通神明故祖宗禋福德合天地則草木呈祥至孝所感生靈遂性湛恩既溥異類懷仁大告休期累彰嘉瑞況我祖太清別殿奇樹効珍連理雙莖混成一體其同本也所以煩於衆枝其附內也所以慶於無外必有削之類亦表其強幹之休天下一家本枝百代稽于圖傳可以明徵聖敬所臨神心允答不然其獨秀不遷之廟增華太素之宮曲折合符精靈相會耿光丕貺高映古今臣媿無黃老之術謬贊清

虛之化獲奉休異喜萬恒情望請宣付史官編之簡冊無任欣抃之至謹奉表陳賀以聞臣某歡誠慶頓首頓首

為宰相賀李樹陵冬結實表

孫逖

臣等伏見劉麟奏南郡李樹陵冬結實并圖及李實者惟此珍樹名應皇族玄元所指用興長發之祥明靈是憑故表非常之瑞已經夏實更發冬榮霜雪而翠華不凋斯頌而朱實皆就仁及草木既叶太平之期道貴生成仍呈久視之應恭惟聖感詎可名言所以彰寶祚之靈長表天枝之碩茂遠踰海嶠來薦闕庭豈三秀之足稱何兩岐之敢喻殊祥荐至品物同歡况在臣等勝抃躍無任欣慶之至謹奉表陳賀以聞

中書門下賀許州連理棠樹表

德表

權德輿

臣某等言今日中使某已至奉宣進止示臣等陳許州觀

察使上官沘所奏許州長社縣嘉禾鄉合德村連理棠樹
一株者謹按孝經援神契曰王者德及草木則木連理伏
惟陛下聖澤玄功浹洽生類故天休滋至地產交感亭育
變化為百祥珍木敷榮異根合榦表滋植物以瑞康時
况嘉禾名地已同唐叔之獻甘棠挺秀寧比邵南之什芬
芳連理遐邇叶心叢滋慶祉昭煥圖籍臣等謬參鼎鼐喜
萬恒情無任欣踴躍之至謹奉表陳賀以聞

貞元八年四月一日

皇太子賀芝草表 高宗

崔融

臣某言伏承某月日芝草生于乾元殿瑞命天來符祥
日至煌煌三秀分芟一作藻井而攢柯曄曄九光間梅梁而
吐葉晉都宮閣何必靈芝之臺洛邑山川居然密發之地
中伏惟天皇典臨海內帝有域中兼漢制而宅兩京用堯
心而加百姓神精下降洽至道於丘陵靈秀霑被深仁

於草木觀其如蓋如閣一作為蓋如日如星傳五方之氣象

合四時之景色仙人在上則車馬疑飛神龍居下則風雲

不去謂蓬瀛之海列一作到即崑閬之山開魏皇之雙榦莫

儔漢帝之九莖為劣可以薦郊廟可以觴公卿臣謬踐儲

闈祇膺守國不獲親承左右目覽休徵雖玉脛疑作延逆疑作齡

在神仙而可致而方疑作刀圭入膳視朝夕而猶駭是用心

馳仁壽之前慶集肅成之下無任抃躍之至謹遣某官某

奉表稱賀

皇太子賀天后芝草表

前人

臣某言臣聞德合天地仁之所及也深道貫神明孝之所
寘也極故有玄功膺靈命氤氳瑤光發辰象之精金色
吐陰陽之秀伏惟天后化含萬物訓正六宮天下被塗山
之音海內仰河洲之教今月某日使某至伏承草芝生於

東都太原守舍利塔屋下芝英繞殿蹙疑王母之臺芝草
成田聊比宓妃之館其蒂紫其莖白露濡雨露之津搖動
風雲之氣斜臨網樹分貝葉而重開近對輪池接蓮花而
倒下豈與夫生於石室空傳好道之言產自珠宮徒事不
經之說可同年而語哉臣濫承天祚多慙國本始欽玄澗
之祥更喜黃雲之地頌聲無輟在郊廟而方傳御膳有憑
俯神仙而何遠臣子之慶倍百恒情無任欣抃之至

為宰相賀合鍊院產芝草表

孫逖

臣等伏見道士黃河清等奏興慶宮命鍊院內產芝草五
色分輝六莖神丹入鍊而轉精禎祥應期以如荅觀
茲嘉瑞望宣付史官者伏以靈芝所致和氣之精著羨仙
經標名瑞典陛下深仁契道至德通神鍊液飛丹既啓長
年之館敷華有葉遽呈三秀之祥五色有類於卿雲六莖
且符於帝樂豈唯動植昭感以表於休徵固亦貞仙叶應
用彰於聖壽臣等忝侍軒陛倍深慶悅無任抃躍之至謹
奉表陳賀以聞

代百官賀芝草表

獨孤及

臣某等言伏見開府儀同三司魚朝恩奏含暉院及白華
亭院內並芝草生者臣等謹按圖謀集作謹按竊考前典

集作志蓋王者以道莅天下而德及庶物則有靈木神草集

神草木靈草儲祉集作效異陛下賢聖恭儉茲仁愛人開闡學校

尊教勸德將以五經根本庶政風化所決神人以和和氣

傍達感蒸為瑞集作蒸和氣傍不然豈靈芝菌蠢異處同植

不產他宇必宇宸居曄曄九葩之蓋煌煌三秀之質蓋表

陛下之欽明光宅以人文成化靈根碩茂萬葉無疆神應

炳然天意如荅臣等獲共朝列幸觀禎祥云云

中書門下賀芝草嘉禾表

常衮

臣等言伏見兵部尚書中書門下平章事李抱玉進芝草嘉禾者臣聞王者道洽則靈芝生天下和一則嘉禾應伏惟陛下誕膺景命憂濟生靈合太上之德感元之精氣天地氤氲神明滋液降此珍物叶於昌明垂蓋連莖三華煥發離根合穎一穗孤秀沐我溼澤扇祥其風衆英草之百穀之長以兆稔歲以符太平昔周得唐郊之獻列篇於典策漢獲甘泉之祉薦歌於清廟三瑞之極一朝會同長發其祥無疆之慶臣等謬參近侍幸覩休禎喜抃之情倍萬恒品無任歡抃之至

中書門下賀芝草表

前人

臣某言今日中使吳承一作承清至宣示宋汴節度使御史大夫田神功所獻芝草一株紫莖蓋黃叢生者天生神物王

者嘉瑞奇秀之狀靈篇未書伏惟陛下孝通神明德至草木和氣所感禎祥屢彰煌煌靈芝郡國來獻垂以金蓋發其瓊葩爛然紫雲之色灼然紅藻之秀土德斯應皇家永昌固可寫狀圖諫薦于郊廟祇奉天意贊揚鴻休臣等獲覩殊祥嘉倍恒品無任慶抃之至

皇太子賀嘉麥表

崔融

臣某言伏見雍州司馬徐慶稱所部有嘉麥一莖六穗纖芒濯露疑因黑壤之宜香稼搖風若吐黃金之色豈非靈心昭應眷德感通降之自天何順來麩之詠嘗之于廟先符孟夏之時凡在靈生相趨動色臣謬當居守肅奉宗祧一穗兩岐徒說張君之詠十畝千石方經汜氏之書仰天意而增歡顧人心而載躍無任喜抃之至謹附起居使某官某奉表陳賀以聞謹言

中書門下賀恒華州嘉禾合穗表德宗 權德輿

臣某等言伏見武俊所奏恒州鼓城縣生嘉禾一本合穗
又盧微奏華州郾縣太平鄉三交里獲嘉禾一穗者謹按
孫氏瑞應圖曰嘉禾者五穀之叢王者德茂則生伏惟陛
下德叶玄功仁育生類同穎擢秀殊祥並時昔周道既昌
唐叔以獻表天下和平之兆為陰陽訢合之符今五稼登
成百嘉儲祉發於厚載集是休徵况嶽鎮之方表章繼至
感通昭晰莫甚於斯臣等忝列台司喜倍恒品無任欣抃
踴躍之至謹奉表陳賀以聞臣某等誠歡誠喜頓首頓首
謹言 貞元十五年
九月七日

賀嘉表

張仲素

臣某言今日某日伏見平盧淄青等州節度使鄆州大都
督府東平縣官莊地內有禾異龍雙本合成一穗畫圖奉

進傳示百寮者臣等中謹按瑞應圖曰王者德茂而太平
君臣和則嘉禾朱草以中萌言不得中和之氣即不生也
伏惟陛下鼓和風茂休德泰階平於上下大中建於人臣
神明是若銜兆必報通彼殊隴摠其雙莖滋大滋以冥造
成嘉穗而薦和合為一彰至化之會同堅而好表資生之
豐實推物類以得天意觀繪事而靈篇九在班行咸 罔
慶幸不勝 云云

為百官賀千葉瑞蓮表 武后

崔融

臣某等文武官若干人言伏奉恩旨垂示臣等千葉瑞蓮
觀其綠裏紅葩細莖素萼露搖珠點霞坼金驥百星交映
羽蓋張而一色萬目齊明車輪合而千狀謂翔鸞之欲舞
若群鷁之並飛峯形聳而半天石勢蹲而臨海冲氣積其
下惠風流其上服之可以登仙採之可以駐壽雖復釋梵

天王之國千影離婁善住天子之池雙輝燐爛校之今日
未可同年臣等謹按華嚴經云蓮化世界是盧舍那佛成
道之國一蓮花有百億國無量清淨經云無量清淨佛七
寶池中生蓮花上夫蓮花者出塵離染清淨無瑕有以見
如來之心有以察如來之法道之行也曾不徒然伏惟天
冊金輪聖神皇帝現此妙身當資巨瑞符契宜合影響不
差有百億國無量清淨者天意若曰護蘇蟻結默窠蜂飛
聞鼓鞞而革面望旌旗而懸指一麾而邊境獲安高枕而
中國無事風行電掃納噍類於百億之區霧廓塵銷反遊
魂於清淨之域深仁所及不亦弘哉臣等濫奉朝恩親披
瑞謀非常之貺曠古未聞殊特之珍歷劫一見手舞足蹈
倍百常情無任慶躍之至謹齎朝堂奉表稱賀以聞

中書門下賀神龍寺渠中瑞蓮表 德宗 權德輿

臣某等言今日中使某公奉宣進止示臣等神龍寺殿前渠
中瑞蓮花圖其花一莖兩房者伏惟陛下仁聖感通私被
生植宥萬方之暇必順天心於九重之中別開佛剎網緼
降祉菡萏敷榮瑞茲灼灼之花迴出田田之葉吉祥殿外
芳集作馥殊常功德池中光華交映扶踈發越並秀相鮮
玄功嘉應超貫圖謀彼芝稱三秀有兩岐雖驗休祥豈
階妙法觀房之挺茂荷一雨之均霑陰隲生成發揮嚴
淨臣等忝居樞近倍萬歡心無任欣抃悅懌之至謹奉表
陳賀以聞 貞元十八年六月八日

賀西內嘉蓮表 德宗

柳宗元

臣某言今日某時中使某至奉宣聖旨出西內神龍寺前
水渠內合歡蓮化圖一軸示百寮者祥圖煥開異彩交映
贊天地之合德表神人以同歡臣某誠歡誠慶頓首頓首

伏惟皇帝陛下道協重華慶傳種德陶陰陽之粹美孕造化之精英告慶每見於天心發祥必自於禁掖是使雙華擢秀蓮蒂垂芳香激大王之風影耀集作天泉之水煥開宮沼旁映給園靈既應期天龍護聖寶曆瓊超於小劫神功允洽集作於太千臣某獲覩昇平濫居榮寵聞瑞應而稱慶仰繪事以增歡無任抃蹈喜躍之至

賀西內嘉蓮表

張仲素

臣某言臣伏見今月九日中書門下宣示百官西內池中嘉蓮圖其連一本兩花者臣聞明聖有作天人合應既彰花本必降祥符即事而推昭昭可見伏惟陛下儲精要道憂濟群方致理大同猶懼不至所以恢弘聖教冀福生靈玄造感通嘉瑞屢降况茲萬首儒釋同稱經文但喻乎淤泥詩人待歌於彼澤豈比夫耀銅池

傳芳丹

禁濯影清流特聳孤莖以表清淨之源一致對敷雙萼是明內外之教齊興天雖不言假物明意臣仰披圖牒越覽古先豈無禎祥莫此著望雲就日徒深抃躍之誠舞德歌功何報恩私之重無任抃賀慶躍之至

為百寮賀瑞筍表

李嶠

臣某等言伏見舊明堂基前有叢竹抽新筍數莖綠籜含霜紫抱承雪陵九冬而擢穎冒重陰而發翠伏惟陛下仁兼動植化感靈祇故得萌動惟新象珍壹之更始貞堅効質符聖壽之無疆帝產而虛心當歲寒而抱節一人有慶萬類呈休凡在見聞孰不欣躍無任慶抃之至謹奉表稱賀以聞謹言

為朝官及岳牧賀慈竹再生表

陳子昂

臣某等言臣等聞書曰天視自我人視天聽自我人聽故

堯臣放命降震怒之災姬旦聖人集作姬聖尊仁受昭事之福先

王所以恭畏上下祇奉天心於是有昭德塞違懲惡勸善

所以明柱直正典刑一昨伏奉恩勅宣示司農卿宗正集作

卿所奏日者王德壽等承使失旨霄濫無辜災感蝗蟲毒

痛慈竹寧歲為之飢饉吐庶以之流離冤魂冥呻玄感上

惻乃降明制法德陰恤錙刑蠲虐典於是幽鬼雪憤遺噍

昭蘇枯竹由其再生蝗蟲為之隕跡集作詳蠻動色瘡痛

收氣當天札之凶年致昇平之稔歲非夫聖靈昭感天人

合符何吉凶之徵報同影響天下幸甚臣等聞聖人法天

所以順物小人違道則必亂常故虞稱欽明嚴四凶之罪

魯有仁義正兩觀之誅所以邦家用昌苛慝不作王某等

色厲內荏心僻行堅弄措刑之文為商表之法以訟受服

同惡自尤竟招殛竄之辜允肅政刑之序今者蒼膺歛翼

乳虎含牙朝廷無腹誹之憂天下有措手之頌信可以懲

殘創酷誘善旌寬永清侮弄之階共登仁壽之域臣等謬

贊臺閣忝守藩維實思仰奉大猷以穆中典幸屬至聖崇

德小人物用凡在庶品實百恒歡雖成康頌聲文景然化

刑清政肅曾何足云伏乞書之國經頌示天下使四方風

動萬國歸仁垂範後昆以為炯誠無任慶抃之至

賀蓮理棠樹合歡瓜白兔表 武元衡

臣某言臣聞至德有感嘉瑞必呈非汪洋霧霈不能動神

靈非葳蕤合選無以彰明聖伏惟陛下登建皇極三紀于

茲情無忘於一日德彌新於萬載懷徠反側優容直諫至

仁所漸潛銷於毒螫大賚所及無間於忽荒故得禎祥荐

臻簡策填逶迤於今日不可勝書此實上天所以丁寧俟登

封告成也今又見許州長社縣劉城地內連理棠樹圖徐

州狀進彭城縣陽守志園中合歡瓜圖又進白兔并圖等
伏以甘棠符於國號連理表於邑中瓜峽頌於詩人合歡
守於園內兔居卯位白順金色金者取象於武臣白者明
資於義邑足表巍巍宗社長慶於大同赫赫天棧永崇於
皇度裨秉旄節必効精誠縣象告人焯乎明著竊覽前志
歷考休徵積彼千載之祥無茲一歲之盛臣忝弘恩
所未聞抃舞之誠倍百恒品無任云云

文苑英華卷第五十六十三

登仕郎胡

柯

御貢進士彭

叔夏

校正

文苑英華卷第五百六十四

表十二

賀祥瑞四

為朝臣賀涼州瑞石表一首

代皇太子賀石龜負圖表一首

為納言姚疇等賀瑞石表

為納言姚疇賀瑞石表一首

百寮賀瑞石表一首

賀天尊瑞石及兩表一首

為宰臣賀武威石化為麵表一首

為涇州李使君賀慶山表一首

為許智仁奏懷州黃河清表一首

賀秦州河清表一首

中書門下賀滑州黃河清表一首

賀河清表一首

中書門下賀醴泉表一首

賀樂陽醴泉表一首

為朝臣賀涼州瑞石表

太宗

上官儀

貞觀十
七年

臣元嘉等言臣聞太陽含宇天之命也德水呈文地之符
也是知光膺寶曆非幽贊無以享鴻名對越兩儀非神物
何以昌丕緒故有玄龜負卦絲表軒功朱鳥銜書兆彰姬

錄非聖人之撫運孰能與於此乎伏惟皇帝陛下慶韞上
元與天皇而合德祥凝太始體耀魄以齊明作周錫胤王
業本於水翼生商降祉寶祚基於玉筐然後樞電郊神
皇虹授彩彤雲澹景標映龍顏瑞火流光發鳥跡由是
疑圖作極握紀張天化洽九垓恩錦疑作八表功成戢武
散駢服於苑園業定弘文覃正朔於昌海輯五玉而彰禮
備陳萬舞而表樂成至德至仁垂拱巖廊之上乃聖乃神
遠算廟堂之下憲文王而授立昭天獎於夢齡象漢帝以
登賢選仁明於刻國重曜而臨照家萬宇而永貞是以
淹歲允陽離輝昇而玄澤降春疇罕闕震方建而年稼登
受冊之良隨輕輪而翊佳氣夏絃之月接飛蓋而吐芝英
郡國陳孝德之符煙浮一作霧集縣道奏明靈之貺電擊雷
奔豈與夫日至月書可同年而語矣伏見涼州都督李襲

譽表奏昌松瑞石合百一十字其文曰高皇海出多子李

父

唐書伍行志作元

年八千

唐書

年太平天子李世民王

唐書無王字

千年太子李治書燕山人唐書有王字樂太國主尚注謬唐書

作注

獎文仁邁千古大王五王六王七王十王

唐書無鳳尾王字

唐書

才子七佛八菩薩及上果佛田天子武文

唐書作貞文武

觀昌大聖延四方上下萬治忠孝為善

八字唐書作上不治示孝仙

為善

其文不次者略而不載勅遣禮部郎中柳逞馳

驛檢覆並同所奏皆素文玉潔若瓊樹之華滋玄蘭碧鮮

擬翠微之遠色雖復霞燦輝冠岳鑿誅疑於丘海鏡浮山

昭刊名於稽崑方滋秀麗曾何足云臣等歷選皇猷稽河

圖於東序詳觀帝錄案冊府於西崑媯媯以前不可得而

知矣義農以降考載而言焉若乃馬造堯壇鳳銜虞冊遊

麟吐字頗涉劉邦葉露為文纔稱病已玄石降徽於典午

赤伏錫命於炎精皆騶騶如神徽文見意或傍通以取證
或索隱以求端猶且動色當年光華曩志矧茲天冊顯發
靈之
頌聖德之欽明通史筆之揚堯典述國祚之悠
永陪龜策之卜周年追美先朝衍軒丘之得姓武昭式儲
后邁鈞臺之有光豈非天鑒孔明聖猶大者祥彌著靈心
至察德加厚者祚逾長是用越契超繩光前振古績無與
二慶溢登千臣等自省微生幸霑鴻造荷重光之煦育觀
三才之宅心雀羅無以表其誠鳧翹不足勝其善臣無任
悅豫之至

代皇太子賀石龜負圖表

高宗

崔融

臣某言臣聞虞舜五帝也夏禹三王也應曆數則星昴告
期度水土則河精授象故知至誠上感無往而不通神道
曲成有來而先見伏惟天皇運斗極平太階涵德澤於海

河散皇明於日月煙雲郁郁鳥獸嗒嗒百寶用而銀甕滿
五穀豐而丹旣出化之遠及陰陽不測之謂神德之廣被
天地無名之曰道嵩維嶽洛陽下都此焉符理之所告
則仙靈之地伏見洛州牧相王所奏嵩山下頂封禪壇側
掘得石龜負圖篆文一百六十字者臣亟聞其言矣昔者
黃轅東省河獻龍書蒼頡南巡洛呈龜字古猶今也其若
茲乎夫惟氣挾風霜文含星象玉經山上匪藉傍求銀丹
池中居
暗發頌國祚之長久孕育於萬八千年歌卜筮
之叶從牢籠於六十四卦况復高臨泰室近控壇
王者之封常有君來之望由是神工不召若鑄金鏤之銘
天意潛彰似刻銀繩之篆豈與玉龜在泰山之上莫覩其
祥石龜出吳江之右空傳其跡可同年而語哉臣才謝元
良忝當儲貳三靈瞻命預聞東序之圖萬國歡心願奉南

山之壽無任悅豫之至謹遣某官某奉表稱慶以聞臣某誠歡誠喜云云

為納言姚疇等賀瑞石龜表武后李嶠

神仙疑作神授

臣某言伏見衡州所進瑞石形似龜頂上有文曰大周并有乾坤封字左邊有王武九千字又有水火金木土字各依其方北邊兼有井字臣等詳觀靈狀觀奇文事實非常理同神仙疑首列大周文疑作字表元首之尊左有王武之名明左

契之執合乾坤之兩卦分金木之五行展轉而不窮

兩卦同流而無極井以養物而知屋疑作澤之下覃石以

補天疑顯貞疑而上列將以九千之寶祚嗣七百之鴻基

兆發靈心事符喜運况復名為玄武叶國姓而呈休出自

炎方迎嚮明而發祉祇神之命受托於四靈感應之符實

超於千載臣等叨延獎恩屢觀一作嘉祥喜抃之情實百

常品無任慶躍之至謹奉表陳賀以聞謹言

為納言姚疇等賀瑞石表武后前人

臣某等言伏見瑞石有文曰武帝李彰好生臨國永保吉

昌伏惟陛下受命昊穹降靈宗祐復棟重檐之禮嚴配昭

升五刑九辟之科平反春恤故能使三精孚德七廟垂祥

頻降靈符屢彰潛祉好生臨國寔開琬琰之文永保吉昌

顯示貞堅之錄隆萬代之遐筭曠千齡而不聞臣等叨沐恩

私謬當樞近親覲休寶相趨抃躍無任喜慶之至謹奉表

稱賀以聞仍請出示百寮并錄付史館

百寮賀瑞石表武后前人垂拱四年

臣某等言臣聞高明博臨無遠不應正直替感雖幽通伏

惟皇太后陛下慶發曾沙業隆大寶以至明當宗社之寄

以至聖合乾坤之德荷三葉之休光承五行歷紀平秩

庶政大亨羣物冠帶荒遐之域天福日臨閭閻富壽之氓
禮樂變和液露霑洽休徵昭顯用能上披乾象下發坤珍
吐川之靈祕開神之韻匱伏見雍州永安縣人唐同泰於
洛水中得瑞石一枚上有紫脉成文曰聖母臨人永昌帝業
八字臣等忝窺靈迹駭矚珍圖俯仰殊觀相趨動色竊惟
聖德奉天運為先後神道助教相同發因明陛下對越昭升
欽若扶揖允塞人祗之望寔當天地之心所以幽贊嘉兆
傍通景貺且人稱同泰縣實永安姓氏將國號玄符土地
與石文明應表裏替會樞機宜發明宴坐之逾昌驗皇基
永泰則自然之無朕不測之謂神非夫道格昊蒼德克
幽顯豈能發何言之微旨臻不召之靈物考皇圖於金冊
搜瑞典於瑤編則有蟲嘉成文魚鱗吐匣丹書集於昌戶
綠錯薦於堯壇或詞隱密微或氣藏識締莫究天人之際

罕甄神秘之心未有昭聖毓靈發祥隕祉明白顯著燭耀
暉光若斯之盛者也且天尊洛疏津卜纏經宇是開帝王
之宅實謂書之泉伯禹以致孝鬼神九疇天錫陛下以
虔恭顧託八篆靈開超萬祀而同存百歲而罕逮况乎
陰陽景測朝市天臨號令施於四海機衡動於萬國靈心
叶贊景業會昌薦希代之鴻寶獲非常之嘉應固可以明禮
太室禮秩介丘副神宗之迺卷答上玄之蕃祉臣等遇偶
休明榮叅簪笏千年旦暮邀逢累聖之期百辟謳歌喜屬
三靈之慶無任鳧藻踴躍之至謹詣闕奉表陳以賀聞

賀天尊瑞石及兩表 武后

臣聞大悲握契汲引之數盈千玄聖垂機感現之瑞不一
隨緣應俗或作儒童降跡通九帝為長者然則佛
同一字可通疑作非道理兩名至矣哉不可得而稱也伏

惟天冊金輪聖神皇帝陛下功成塵劫跡御金輪萬姓樂
 推百靈欣戴如來備記昔避天女之宮菩薩降生遂坐全
 之國臣等一昨伏見四疑岳雲臺觀道士奏稱御像瑞石天
 妙至極天尊一鋪創造聖容未施五色宿昔之頃畫續自
 然不加分完同神化七十二相合而成體八十一好散
 而成章披降雲之屋闡明霞之館千乘億騎浮空而下九
 仙五老步虛而來羽袍錦帔風搖雲起龍文而鳳章日縣
 而月綴威儀而辟侍衛無聲坐疑龍漢之遊何必仙山之
 會自非陰陽不測變化無方憑法匠之威靈假神功之動
 用其孰能與於此中賀臣等又聞先天後天聖德合於無
 象欲雨而雨立契通於不言日者王室屋一作間炎方在
 候陛下乘朱輅駕赤駟歷太陽之中道居明堂之左个百
 神授職萬國來朝既配帝而嚴裡亦統天而布政是特也

慈雲結慶甘雨流香微風蕭然纖塵不起凡百在宥動色
 相歡成以為天者萬人之本物有不霑於澤者則仰皇天
 而望之有不覃於惠者則吾告而請之更祈洪對輒聞流
 潦俄而油雲族晚覆雙闕而朝濟膏雨及私浹三川而
 校疑下郊原吐潤品暈霏蘇麥壟纖莖已濯兩歧之秀黍田
 香粒方滋合穎之苗凡在群生不勝幸甚然後知御震臺
 而占繇幸洛陽而錄囚蓋其眇小曾何髮臣等忝簪
 笏預睹珍符惟德洞冥即叶元皇之化惟靈薦福長延梵
 帝之尊拊蹈之情倍百恒品無任鳧藻之至

為宰相賀武威郡石化為麪表宗孫遜天寶三載

臣等伏見王儒奏武威郡番禾縣嘉鄉天寶山周回五六
 里石化為麪在近村間及諸郡部落自今載正月己來
 取食甘美益人又按圖經貞觀九年鳳凰集於此故名嘉

瑞鄉其天寶山在此鄉界者伏以神道設教變無方聖人為心感通必應陛下仁霽動植澤及生靈故得地不藏瑞石變為麩既資人食又齊邊廩成熟自因於道氣艱難不待於農功豈燮燧之足何雨粟之能喻况山符聖號用彰於萬壽鄉表瑞石允迪於前烈殊祥叶應景福攸臻臣等忝侍軒墀倍深慶悅無任抃懼之至謹奉表陳賀以聞

為涇州李使君賀慶山表

武右

崔融 垂拱二年

臣某等言某日奉某月日詔書新豐縣有慶山出曲故縣囚徒改新豐為慶山縣賜天下酺三日凡在舍生孰不慶幸中賀微臣詳窺海記博訪山經方丈蓬來之疑作跡所罕到層一作城玄圃道家之妄說伏惟皇太后陛下應天順人正位凝命中外咸一陰陽以和嘉禾四方而平春露草三旬而候月冲息浹洛嘉貺駢闐當雍州之福地在漢都

之新邑聖渚潛開神峯歛見政平而湧自蕩於雲日德茂

而生非乘於風雨游龍蜿蜿疑疑八卦之圖鳴鳳嗷嗷似

發五音之奏仙蠶曳蘭美稼抽芒一人有合於天心百姓

不知其帝力方驗鎮星垂象山萌輔地之衍太歲加年水

兆載坤之應天人交際影嚮合符雷雨既作喜氣充於三

象鍾石以陳歡心動於萬物臣幸忝簪帶濫守藩隅不獲

馳蒼闕而拜手望紫庭而繼足殊祥踵至寶筭無疆厚賚

傍霑群生一有之幸甚不任悚踊之至謹遣某官奉表以聞

為許智仁奏懷州黃河清表

太宗

許敬宗

貞觀十

臣智仁言臣聞德水清漪詩人以之興頌濁流澄鏡大聖於是登期伏惟皇帝陛下道叶二儀功超萬古上玄降祉變孟津於淶波厚載呈祥發榮光於翠澗臣以去月得河內縣申云自太平村已下二十餘里河水變清各逐淺深

冷然徹底鱗介之族無所藏形一作養藏謹自依極此句息同
其狀又高高維岳影入清流少室竒峯參差具寫謹按易
坤靈圖曰聖人受命瑞見於河伏見京州玄石武招靈命
臣部黃河應時清徹天禱地既既符易象之文聖祚河清
暗吞靈圖之義古人歎其難候臣今仍得親觀身沐太平
之風目擊會昌之瑞無任悅豫之至

賀秦州河清表 太宗

同前

臣聞崇高不極之謂天廣博無垠之謂地若乃參天地之
玄化代覆育之神功者其在聖人乎故能俯司五情恩浸
八紘允膺千載仁靈萬代明靈之既自我所招幽顯合符
斯其効矣伏惟皇帝陛下家六合馭三光推明允之一心
置於天地之腹用狗齊之四目昭於萬物之情晴疑靈籟卯
之不安猶懷夕惕輿頌芻蕘之馨疑高迴天瞻其所受育

帳當作帳

者多矣而况於鰥寡孤獨乎其所容納者衆矣而况於公
侯卿士乎至若削平宇宙混一華夷乃武也致疑教會昌樂
新禮創乃文也穆叢廊以凝睇調風雨於絕恨疑乃聖
也運埏埴以裁成動陰陽而不測乃神也體茲四春伴彼
兩儀神物之來蓋惟常理伏見秦州刺史表今月疑白河
水復清深淺澄映百有餘里清自龍門之下驗登期以御
天波及萬春之早表無疆以彌壽臣又聞道之所格者弘
則靈之所感者大德之所包疑原疑則天地之所應疑深是
以千祀登期自右歎其難遇一歲之內祚聖人而再清求
諸典墳竟無倫匹在於明世絕後光前宜其上答靈心升
中告禪金声一作譽玉振合百神於介丘玉輅朱輪副萬國
之翹首則普天幸甚何其樂歟臣等越自下才欣逢上德
致百王之不致聞億載之未聞舞蹈之深實百恒品

中書門下賀滑州黃河清表

德宗 權德輿

臣某等言今日內侍朱希顏奉宣進止示臣鄭滑觀察使姚南仲所奏今月一日至六日白馬縣界三十里黃河清者伏以道集作導自積石出於崑崙乃建靈源之封特視上公之禮克符昌運必降殊祥伏惟陛下聖澤感通休銜集作碩疊委惟此濁質化為清瀾國典所書是稱大瑞詩曰俟河之清人壽幾何歎其不可得而見也今則白馬之津三十里所澄徹如練淪漪成文一邦幼艾共覩嘉應萬寓經界式彰永寧昔秦號水德徒推厭勝漢紀河平苟安決溢神功幽贊獨表清時足以薦諸宗廟書之史策臣等忝集作登樞近獲奉休明無在欲抃踴躍之至謹奉表陳賀以聞臣某等誠歡誠喜頓首謹言貞元十四年閏五月十五日

賀黃河清表

憲宗

道疑作運

臣某言臣得進奏官狀伏承河陽奏記水西界從洛口黃河清一百六十六里又橫海軍奏界內黃河清澄徹分明者臣聞聖人在上天下和平風雨時若則海波不蕩黃河清夫土所以載水水所以利物天意鍾土德之道疑開水瑞之華符我上聖祥於下土中賀伏惟睿聖文武皇帝陛下蹈十聖之原軌陳一王之大法垂衣裳以朝萬國舞干羽而來四夷平泰階於天躔偃師節於靈臺故得濁波渾渾千載一清長瀾浩浩百里如鏡氣新天宇光澈地脈仰分萬象之法中涵十聖之德初澄海裔表陛下橫恩波於海上再清洛口助陛下鋪文明於土中二十八日北陛下告成之日也百六十里期陛下得聖之數也臣謬承分閭之寄叨榮持節之權生當海晏之年幸識河清之日未奉明詔不敢擅離軍府詣闕隨公卿蹈舞明庭下情無任西望

踴躍之至

中書門下賀醴泉表

代宗

常衮

大曆二年

臣等伏以西京櫟陽縣有泉水於平地湧出潔誠飲者錮疾咸痊稽之圖謀是曰醴泉臣聞和氣上感湛恩下浹則有休徵以彰至化在兩金之地待啓英泉之瑞無源獨湧平地滂流當神明之積高表陰陽之不測其氣香潔其味醇抱華清而盪邪資靈化以除穢積年之疾一飲皆愈挈瓶而至重趺相望日以萬計酌而不竭齊莊之誠益厲神達之效愈彰伏惟陛下弘父母之深仁納黎元於壽域感此靈液助其生成疾苦假除天昏不得勿藥有喜愛人斯甚可以見天地之心可以明帝王之德昔唐堯至聖光武中興霈然發祥千歲一覩啓我昌運居然合符鴻休無疆天下慶幸臣等謬司近密喜倍常情無任忻慶之至

賀櫟陽醴泉表

獨孤及同前

臣等言伏見京兆尹李勉奏櫟陽縣有醴泉出飲之者痼疾皆愈臣聞王者澤周庶類則神降百祥天地之心去人不遠陛下厚德載物與坤同符以善利人如水潤下故厚集作土獻瑞湧泉療疾靈源酌而不竭沉痾飲而皆痊勿藥之喜萬人是賴仰窺天意豈不以是彰陛下之德施乎不然何衆庶顛顛強名聖水彼丹旣集作非朱草白麟赤鴈徒稱太平之瑞未聞功施於人方之聖泉豈喻神異臣等無任喜慶之至

文苑英華卷第五百六十四

登仕郎胡

柯

鄉貢進士彭

叔夏

校正

文苑英華卷第五百六十五

表十三

青賀祥瑞五

賀杭州等龍見表一首

賀隰州等龍見表一首

賀常州龍見表一首

賀富平縣見表一首

皇太子賀曰龍見表一首

賀麟跡表一首

賀東川麟見表一首

為魏州成使君賀白狼表一首

中書門下賀文丹國獻曰象表一首

賀白鼠表一首

中書門下賀人河陽獲白兔表一首

賀白鹿表一首

賀白野鷄表一首

中書門下賀邢州獲白雀白山鵲表一首

中書門下賀興慶池白鷗鷁表一首

為官百賀白鳥表一首

賀杭州等龍見并慶雲朱草表

許敬宗

臣某言臣聞休氣降祥與聖人而合契明靈之既候昌辰
而咸通自五帝寤寥九皇悠緬神龍迺夏中之世一去莫
追景靈歌伊帝之朝千齡不嗣逮乎茲日翔驟來儀天道
去人何其交際伏惟皇帝陛下化龍疑作乾棟施厚大鑪馭三
光以照臨惣萬寓而光宅雖服荒陬之遠億兆之多一物
不安則宵衣載揚四夷有罪則納隍興歎日者東師作梗
類農皇之夙沙交河阻兵等軒后之獯獫元戎所鞠疑大漠
申湧醴之奇齊斧裁加昌海効靜波之慶旣而西師獻捷
東岱希封日告禎機歲登靈稼表裏禔福彰外平而內成
幽顯合符叶天意於人事伏見杭州刺史潘求仁表稱於
錢塘縣界見青龍一又江州刺史左難當稱尋陽縣界見
青龍二又得汝州及沂州狀稱所部各有慶雲見又延州刺
史席辨稱臨真縣界有朱草生臣等以管窺天之意若曰

青者方色宜頌動以東巡龍者帝閑可駢駮於大輅非煙
五色雜雲旗於翠華朱草三英代靈芽於芳藉豈非以茲
幽旨警悟皇情促升中以奉高歟臣等自慶一生頂逢千
載雖復仲尼將聖恨出圖之末期夷吾大賢嗟比翼之
難致羣臣庸昧竊譬右人幸遇休明勝之多矣披祥溢目
覩秘警心庇大厦以相歡荷施生而罔謝無任鳧藻之至

賀隰州等龍見表

前人

臣某等言臣聞徇齊御極玄瀛疑作表其麝鳳文思則天黃河
既其龍馬是知利充於物乾坤應而合符行出於身明靈
感而幽贊伏惟皇帝陛下道登邃古功濟懷生發軔升而
墾災出漢書除害坐玉帳振金鼓運夫機掩區縣然後散服
林塞偃伯靈臺羈左袂以長纓同文軌於遐裔禮高年以
執酒酌

通孝敬於神明猶

且昧旦正顯凝旒庶政臨草纓而罪已削金謀以勝殘化
洽風移禮修樂備是以百靈効職四海夷波物不疵癘人
無詰窳烟雲動色星辰叶契犧雙銘之駿奔奠飛甘之清
醴黃銀揆彩紫玉摘英粵自離陸之前其事無得而聞義
軒之降書契可略而詳焉未有茂實鴻名若斯光大休徵
美端疑作如此感通伏見隰州刺史表裏疑異度表稱某月日青
龍見隰州城北大四五圍長八九天謹按瑞應圖云青龍
水之精乘雨而下不處深泉王者有仁則出竊惟升雲騰
霧孔氏論而不知陵江負州疑作大禹對而猶懼豈如丹
文綠錯驟簡皇情或躍且飛亟遊明世蒸哉懿已絕名
考曆觀圖將何取譬臣等撫躬私抃鼓腹相懼忽以微生
同沾一作大賚逢物睹之昌運覽天祚之禎符開闢已來
聞斯遇千齡一會猶謂比肩何幸之深親承旦暮燕雀相

慶實百常情不勝悅豫之至

賀常州龍見表

前人

臣某言臣聞聖人作而萬物覩神靈滋而百寶用是以飛
龍御天五雲騰彩潛龍涵池四海夷波軒帝由其受圖大
昊以之為紀莫不游泳宮沼駢服輿鑿玉饋丹文與會同
而契合金繩綠錯候休明而降祥伏惟皇帝陛下道極上
玄功成下武重光煥錄體春凝圖至德充於兩儀大孝刑
于四海一作網地張天之謂武制禮裁樂之謂文唯幾唯
深運神樞而不測無為無事致曆於平分故能網絡九
重琢磨三代溥天之下用至道而不知懷生之倫荷大造
而無謝於是湛息洋溢休氣氤氳上格天下涌泉不私其
照日月為之揚彩不愛其道鱗介所以騰文神物有徵於
期不忒伏見常州別駕終文英表稱所部晉陵縣尉信都

叔卿等七人以六月十三日於縣城南雲雨之際見有青龍長數十丈大八九圍之乃沒謹按熊氏瑞應圖曰有仁聖君子在位不肖斥退則見惟皇作極感而遂通惟德動天遠無不應是使四靈嘉瑞叶千祀之登期五色榮光高萬古之靈既方且以茲嘉祉造類云亭頌其徽猷歸功清廟豈與夫魚生露晞蔡上荷心竹葦凝珠晨昏合璧校其優劣何可同年而語哉臣等運偶明時預聞靈慶不任亮藻之至

賀富平縣龍見表

前人

臣某等言臣等歷選前辟皇王之道詳焉遐觀曩載致治之方備矣竊聞垂衣垂拱之世追德當而匪寧垂舟乘橈之一作能即析支而僅叙堯氏有竄徒謂可封湯禱無徵非合冊幽贊禱符各擅鴻名俱為稱首况

以括地成象中天作鏡代玄功而造物叶神化以開祥取譬前脩豈同年而語矣伏惟皇帝陛下受初或躍嘯命風雲廓彼重昏裁成一張維立極不盈少選之間五登三度越千齡之表施生靈於動植日用者不知混覆燾於華戎航深者忘遠巍巍乎赫赫乎書契已來未之聞也猶且留神昧旦克念終朝去歲以膏澤遲時撤八珍而罪已今春以濯枝未降輟萬騎於甘泉徇物為心憂勤至矣於是先天致感畝積餘糧聖敬日躋虚心效祉近得富平縣令獨孤仁宗奏云十二月一日白龍見又得忻州刺史李道遷狀云去年二月內景雲出又臣聞之天飛水游洞陰陽而不測雲行雨施混神妙而無端龍之謂靈義彰於此至乃千年疑慶四和克瑞名叶堯歌色符軒紀卿雲祈既復在於斯陛下挺眷哲之資納明靈之祐是以中天苑苑

貫六位以呈祥祕景紛紛亂五章而發彩故能遠安邇肅
理定功成動而弗違告禪展禮報功使夫同和之樂與
鈞天而並奏無體之禮對上立而庇隆超出萬古之前獨
立九皇之上道格區宇何其盛歟臣等屬會昌之辰曲成
惠日聞嘉瑞再佇升中慶賴之深實兼恒亦不任亮藻
之至

皇太子賀白龍見表高宗 崔融

臣等言伏見某官等奏稱某月日玉山宮西南王谷上有
臣聞天地和聖人所以乘九五帝王符命神物
所以寤黎蒸粵若皇家既高居而遠望於惟史閣亦舒圖
而負璽疑服星辰之冕袞彩奪華蟲建日月之旂常文騰翠
鳳出東方而擾木天下知春臨北荒而銜火容光是燭風
雨順陰陽和五穀登百寶用起孫氏所謂出入應命上

下以時無道則處有聖則見矣大火中星長風季月詳乎
戴禮則帝嚳乘龍之時校以河圖是黃軒夢龍之悔裁金
別字挺玉名臣官模抗殿之基山接陵陽之路翩翩素翼
矯矯白鱗異彩霜封風姿雪操一作銜鄴城之故事若下
神祠探吳郡之遺塵疑過象宮臣聞感通之效人事可尋
嘉瑞之來天心易察地稱王谷先題王者之都壞跡玉山
實兆南山之固天皇以帝出乎震自天鍾有德之期天后
以致養乎坤承天得西南之位披圖按謀影響合符漢朝
之出在上邽特其小者晉國之來從京兆曾何足云唯我
后能得之固前王所不逮方使龍于甸一人繫年月之
書豈宜囿龍于池百姓為朝夕之觀而已臣業謝温文親
聞絕瑞雖四靈為畜未足以舞之蹈之而萬國懽心敢忘
於盛矣不勝亮藻之至

賀麒麟表

李嶠

臣某言今月十六日聖上擬檢行安置大像處其夜舊着
大像曜儀院內從南行向北總有八十一麟跡見外無入
處內有出蹤靈貺潛開禎符顯發唯此仁獸獨冠毛羣識
變知機通靈感化悟金輪之欲轉即見殊祥知玉輦之方
遊先呈異跡九九為數明曆筭之無疆濯成歌見休明
之有應五蹄顯五方之會一角彰一統之符或廣鴻基方
弘象教昔有鳳巢軒閣繆冕相趨龍止堯壇神祇動色豈
若祥開紫掖瑞感玄扃發揮萬劫之符幽贊三天之果美
超六籍珍越四靈曠千古而不聞超九皇而獨遠臣溫承
驅策親覲嘉祥欣慶之情實倍恒品無任抃躍之至謹奉
表陳賀以聞伏請頒示天下錄付史館

賀東川麟見表

憲宗

張仲素

元和七年

臣某言伏見劍南東川觀察使潘孟陽奏龍州寶華山中
有麟見獨角馬蹄遍身光耀并嘉禾二十二莖至八十九
穗麟見與鹿每來同食各畫圖函盛封進者臣聞六合同
歸則麒至天下和一則嘉禾生伏惟陛下昭事上帝疑
情衢室宵奠滌慮申旦忘倦大敷至化以永特邕故得希
世之祥應我皇運異質卓犖奇彩光明顧步幽巖發聞郡
國神物自生於聖日靈編徒載其嘉其嘉名况大田之中稔穗
斯茂沐以膏澤扇其祥風而後彼珍羣承茲共毓必生
長畝之秀以期王者之瑞因緣所驗鄭重合符有以識上
靈之心兆至和之本德超千古慶洽無疆日月所均無思
不服臣等幸觀休異喜萬恒情之至

為魏州成使君賀白狼表

崔融

臣某言某月日得所部魏縣申稱得令孟神符牒稱某日

得佐史長壽卿單守忠狀稱隆周長壽兩鄉界有白狼見
臣等寧恐是虛未敢即申因處分諸鄉若有見者輒令擊
取某日長壽鄉致仕前游擊將軍上柱國朱佛兒於長壽
鄉界內逢白狼馴狎無懼人意遂以繩絡頸擊得隨送者
臣謹按瑞應圖云白狼者金狼精也殷湯時銜鈞入于庭
王者仁智明哲即至動準法度即見周宣王時見而大戎
服伏惟皇帝陛下玄期兆朕靈命氤氳物類有感而必通
符祥不召而總集金精景燥鼓鑄於陽陰玉毳霜翹騰倚
於郊甸應時乃出野心狎而無警有道則游貪性馴而不
搏亦何必兕豹可履蛇地可弄者哉銜故事於琬鈐考異
聞於玉冊出自神符之縣顯符命之通神來於長壽之於
鄉明又長之益壽重以陛下獨尊三界高視四天身運
明哲動循法度既合周王之時仍彰犬戎之服上玄潛驚
佛兒來送天意若曰陛下養衆生其如二乎善守其忠亦
可知矣謹尋令戎唯合申臺臣以尊躋初加神聰顯應守
文不奏恐爽靈心無任躍悚之至謹冒死遣官奏表稱賀
以聞其白狼既非常獸臣未敢即放之山野見令佛兒養
飼伏聽進止

中書門下賀文丹國獻白象表 常袞

臣等言今日內侍董秀至宣進旨文丹國王來朝并獻
白象十一頭者臣聞春秋二百四十年不紀祥瑞而載異
國之朝其在周書亦美西戎之獻蓋重其德化及遠天下
大同也伏惟陛下以至敬事天地以至孝奉宗祀武功以
定大難文德以懷遠人故曰典未載之邦前王不賓之長
聲教所隔言語莫通 悠南沮幾千萬里瞻望中國知有
聖人踰海而來歷年方至紳疑冒重阻奔波載馳黃飾冠

白鑄玩耳伏柔羣象牽置闕前低回馴擾稽顙屈膝隨萬國而來庭與百獸而率舞如知禮樂之節益盛羽儀之容有以彰仁化玄通淳源洽暢至和大順以兆昌期事軼於軒轅跡超於漢化矣臣等謬塵樞近獲觀鴻休伏請宣付史官光照簡策無任慶抃之至

賀白鼠表

前人

臣某言今日內常侍吳承倩宣恩命示臣咸陽縣所進白鼠臣聞王者將致無疆之休必有非常之應臣竊謂鼠者陰類四夷之象白者金精西方之色以西方陰類受制於近郊得非諸戎有納款之誠中國啓受降之兆也伏惟陛下俯憂黎獻控馭蠻夷能以禮綏執云力競而晝伏夜動特擾於封疆乘障安邊尚勞於師旅今天且悔禍戎將感恩方委真於蠻鄙遂呈祥於甸邑干戈既息已有明銜鳥

雀之來多慙遠瑞臣等忝居近侍獲觀禱符歡抃之誠倍萬恒品

中書門下賀河陽獲白兔表

德宗

權德輿

臣某等言今日中使揚明義奉宣進止示臣河陽三城節度使李元淳所奏今月六日於河陽縣城南社壇獲白兔者謹按孫氏瑞應圖曰王者加恩耆老則白兔見又前史所稱多自純孝之本集作感伏惟皇帝陛下誠合天地孝通神明玄符嘉祉遠近相屬雖集作惟此瑞獸是稱月精來應昌期皓然雪彩當盟津之壘俯勾龍之壇郊畿士吏駭視歡賀且自前歲已來中外所列凡在羽毛之族多呈皎潔之祥今八陵園寢修復斯畢萬國臣寮手足相慶盛儀既展靈貺斯臻幽贊素姿若合符契臣等謬居台鼎倍萬恒情無任慶抃之至伏請宣付史官謹奉表陳賀以聞元貞

十四年八月
二十二日

賀白鹿表

令狐楚

臣某言臣得進奏院狀報中書門下奏賀於醴泉縣逮陵栢城獲白鹿一聖敬日躋禎祥荐至臣某謹按孝經援神契曰王者德至禽獸則白鹿見伏惟陛下盛德配天深仁育物和氣交感出為休徵懿此異獸挺茲竒表在橋山之側宛是隨仙來魏闕之前如將率舞天下稱述兆人歡慶昔者周因征伐而獲漢自■祀而臻比今無為宜有勲德臣某幸逢昭代獲覩玄功欣抃之誠倍百恒品所守有限不獲隨例稱慶闕庭無任屏營踴躍之至

中書門下賀白野鷄表 代宗

臣某言內常侍吳承倩至宣示臣淮南節度使陳少遊所進白野鷄者臣聞聖法天以調氣天表聖以呈祥皆啓迪

皇猷發揮至理事均影嚮必在感通伏惟實應元聖文武

皇帝陛下德合大和化高前古休銜異瑞以月擊年嘉疑

率舞以來儀豈疑重譯疑而作貢臣謹按瑞■圖云王者仁聖

旁流四海則見又去祭祀不相踰宴會衣服有節則見取

介之性自能馴狎粹雜之姿翻然純素丹立■檻雪映雕

籠時和自叶於禎祥天意實彰於變化豈越裳之獻獨美

於前王而岱宗之精用呈於今既必然之應幽贊如期載

表太平之符克明柔遠之德臣謬參樞近獲覩鴻休慶躍

之情倍萬恒品

中書門下賀邢州獲白雀白山鷓表 權德輿

臣某等言今日伏奉宣示昭義軍節度使李元淳所進於邢州獲白雀白山鷓各一者謹按孫氏瑞應圖曰王者奉已儉約尊事耆老則白雀見又晉中興書曰天下安寧則見

伏惟陛下純儉成化乾坤合符敬彼黃髮感茲霜鬣俗既登於壽域事多驗於祥經用應昌時固無虛月昔神雀效祉乾鵠知來或用以紀年或聞諸往載豈此山禽叶質靈貺特殊皎潔異姿追飛交映休嘉所集遐邇同歡臣等忝列台司倍百忻賀無任喜慶之至謹奉表陳賀以聞

中書門下賀興慶池白鷗鷓表 德宗前入

臣某言伏承陛下以去月九日幸興慶池龍堂為人祈雨忽有一白鷗鷓見於池上衆鷗鷓羅列前後如引御舟明日之夕甘集作雨遂降者伏惟陛下子惠元元躬勳庶政念切時澤虔於禱祈陛下如傷之誠上感玄貺在烈祖發祥之地下降靈禽潔白異姿翻飛成列若導天意以承宸衷族集作陰雲於一夕灑霈澤於千里疾均影響慶浹公私昔周致白翟徒稱遐邇集作漢歌赤鴈亦薦郊廟豈

比今日感於至誠瑞謀所無蒸人何幸伏望宣付史冊昭示將來臣等備位鼎司倍百懽賀無任欣慶抃躍之至謹奉表陳賀以聞 貞元十三年四月十三日

為百官賀白鳥表

令狐楚

臣某言等昨二十三日中書宣武軍節度使劉彥佐進白鳥并以鳥及所獻圖示百官臣某伏以殊祥絕瑞有應斯歸組緼感通難識其朕惟聖德動于皇天天意勤于聖后則必昭彰彤彤靈物荐臻流行葦之仁樹太平之業毛羽遂性禽鳥呈祥臣等 中賀 臣謹按孫氏圖云王者宗廟敬則白鳥至又漢成帝時白鳥集於文武廟黑鳥皆從頌類此圖去年十一月履端之始陛下擁萬國驅百靈祀圓丘封天老前一日已孝享於宗廟盡敬致美竭力精誠悲感之音動於列辟孝敬之極通於神明白鳥之來允

答醇至書之史冊萬代有詞觀其素彩皓潔丹甯朱耀冰
霧疑作奪色龜龍讓輝參五雲周禮雖有五雲之嘉祥掩
百王之能事臣等叨逢昌運累沐殊私親覩太陽之精克
叶大君之祉歡躍抃舞手足無從不勝犬馬欣慶之至

文苑英華卷第五百六十五

登仕郎胡

柯鄉貢進士彭

叔夏

校正

文苑英華卷第五百六十六

表十四

賀捷

自此賀捷表凡三卷英華所編既不以類從又失其年代各以先後而正之

賀平鄴都表一首

為納言姚璿等賀破契丹表一首

為逮安王賀破賊表一首

為帝右相賀平賊表一首

賀賤自相誅滅表一首

賀章仇兼瓊克捷表一首

為宰相賀檀州界破奚賊表一首

為宰相賀破吐蕃并慶雲見表一首

為宰相賀九姓斬送突厥首表一首

為宰相賀匈奴來降表一首

為宰相賀隴右破吐蕃表一首

李採訪賀收西京表一首

為江淮都統使賀田神功平劉展表一首

為江淮都統使奏破劉展兵捷書表一首

為江東節度使奏破餘姚草賊龔厲捷書表一首
賀表僭破賊表一首

賀平鄴都表 周武帝

庾信 建德六年

臣某言臣聞太山梁甫以來即有七十二代龍圖龜書之
後又已三千餘年雖復制法樹司礼殊樂異至於文類聚
籬武落剡木弦孤席卷天下之心苞含八荒之志其揅一
矣類聚伏惟皇帝陛下握天樞秉地軸駕馭風雲驅馳龍
虎沉雄內斷不勞謀於力牧天策勇決無待問於容成是
以威風所振烈火之過鴻毛旗鼓所臨衝風之卷秋葉竊
聞伊洛戎夷幽并潛偽抱圖載籍已歸丞相之府銜玉繫
綬並詣中軍之營百年逋誅遂窮巢窟三代敵怨俄然掃
蕩昔周王輔水之師尚勞再駕軒轅上谷之戰猶須九伐
未有一朝指麾獨火神慮平定寓內先宅天下二十八宿

止餘吳越一星千二百國裁漏麟洲小水若夫咸康之年
四方始定建武之代諸侯並朝不得同年而語矣雖復八
風並唱未足頌其英聲六樂俱陳無以歌其神武坐鈞臺
而誓衆矧啓繼夏禹之功入商郊而問罪姬發成周文之
志無改之道大孝也歟膏今鹿臺已散傾宮已遣兵藏武
庫馬入華山立明堂之朝奏大武之樂盛矣哉上天降休
未之有也政須東南一尉立於比景之南西北一候置於
交河之北然後命東后詔蒼冥鬻壇琬碑銀繩瓊檢告厥
成功差無慙德臣忝竊榮幸莅政東藩不獲躬到闕庭預
觀大慶不勝晷藻踊躍之至謹遣主簿陪臣曹敏功奉表以
聞

為納言姚璿等賀破契丹表 武后李嶠證聖二年

臣某等言伏見遼東都督高仇須莫華作承露布逆賊孫萬

斬按唐書聖證元年制改契丹首領李盡忠為盡滅孫萬榮為萬斬英華作榮非等驅率凶黨燒
通州城城中出兵與其賊拒戰則有飛廉作氣回祿
揚燦起沙礫而薄天初茲鼙鼓吹煙火而漲日燎彼
鴻毛靈應潛施勇士皆奮遂使妖震懾亂輒而奪旗
善戰橫行摧枯而拉朽僵屍於草莽俘馘聚於轅門善
馬咸牧名王且繫無假燒雞之策而觀其自焚不勞燧象
之師而撲一作其餘燼又凶渠不逞將竊號而假名通黨
未俊一作誅一作止挺妖而怙亂或神摧其股或天厲其身似安
國之登車同伯牛之自牖故知高明輔順正直司懲惟辟
好仁與乾坤而合德惟狂樂禍在神鬼而同誅方看剪滅
之期行覲凱旋之奏臣等叨延獎渥謬奉軒墀抃躍之情
實萬怕品無任慶快之至謹奉表稱賀以聞謹言

為建安王賀破賊表武后

陳子昂

臣某言今月 日得遼東都督高仇須等 月日破逆賊
契丹孫萬軒等一十一陣露布并捉得生口一百人送至
軍前事三軍慶快不勝踴躍臣聞天之所弃雖暴必亡人
之共讎在遠彌戮况凶羯遺醜未及犬羊固作孽以招誅
自辜恩而取滅伏惟陛下威加四海子育百靈集作鬼神
尚不敢欺集作凶狡豈能逃罪逆賊萬斬等天奪其魄坐
自為殃仇須等謹奉廟謀遠憑國討短兵纔接羣逆銷亡
又云反風迴煙燼睛掩目此乃天威潛運神道密固豈止
人謀抑由靈助今盡滅殃病姿固折股一作餓災兼至
凋弊日滋未加天兵已集作自燄燿臣訓勵士馬今日集作
剋行大軍一臨凶寇必殄獻俘在即拜闕有期預喜承恩
不勝慶賀無任抃快之極

為帝右相賀平賊表武后

崔融

臣某言伏奉某月日遶勅逆賊等並已傳首都市幕庭拜
受旌門宣告凡預軍司孰不慶悅中賀臣聞惡禽恠獸有
以彰普覆之仁亂臣逆子不能損盛明之德故三監作難
周王未寢於頌聲七國為災漢帝克臻於刑措伏惟聖母
神皇陛下象天之運法地之安澤浸河海光懸日日以忠
信為甲冑以慈惠為干戈所向無前何人不服舉神兵如
電掃破兇黨若冰離數月妖氛一朝清蕩斯實皇威遠肅
聖化傍霑故能市不改肆人皆安堵臣濫承天澤忝預戎
麾聞逆命而增聽景懸而累抃慶快之情倍百恒品不
任悅豫之至謹附某官奉表稱慶以聞

賀賊自相誅滅表

玄宗

張九齡

此篇當在六百三十七卷賀狀門今已移入姑存其目

賀章仇兼瓊克捷表

玄宗

李邕開元二
十八年

臣邕等言伏見中書門下章仇兼瓊奏稱吐蕃數萬圍逼
于城皆遵奉九重決勝萬里臣聞雷之震者可以破山風
之威者可以蕩海伏惟陛下允答天地丕應鬼神吸之而
百川却流吹之而萬物倒植是以暨勞貔武一掃戎羗高
屋用疑於建龜疑銘戈申於破竹豈云懷縣獨有獲嘉何止絳
城復稱聞喜光風動處草樹為之欣榮晴天轉時日月為
之融朗况臣等分官寄切報國身軀蹈舞徘徊恐門庭之
地窄歌豚踴躍賀邦家之慶深無任欣悅歡快之至謹詣
朝堂奉表陳賀以聞

為宰相賀檀

一作

州界破奚賊表

玄宗

孫逖

臣等今月二十五日於易州所奏事陛下顧謂臣曰朝夕
之間諸軍當有捷書至臣等愚淺莫測天心不逾數日張
守珪果奏副將安祿山於擅州界破奚賊擒生斬級并獲

馬計至數千定期不差於畧刻指事有同於符契聖惟
廣運神以知來微妙之言自成於擊象玄通之術不假於
著龜精義難名前古未有匡等何幸親覩明銜驚喜之誠
抃躍交集伏望宣示朝列兼付史官或昭德音永用垂範
無任嘉慶之至謹奉表陳賀以聞

為宰相賀破吐蕃并慶雲見表 玄宗 前人 天寶元年

臣等比見吐蕃舉國銜兵向二十萬掘壕置柵攻逼定戎
城項因奏事陛下謂臣等曰吐蕃雖衆當即破亡計日之
間捷書必至昨見皇甫惟明奏破定戎城下吐蕃賊二十
萬衆并斬獲大將論莽布支頭隨狀奉進又初與賊相遇
西風甚急及交鋒之後便至風迴旣掃妖氛兼有慶雲見
者臣聞天之討 一作 罪俟盈貫而方誅聖無不通匪常情
之所及伏以一戎凶醜久負恩信敢輸絕漠來犯邊域牟

國興師二十餘萬經時固守八十餘日蟻聚地伏狼顧鳴
張據便地之井泉逼懸軍之塹壘雖逆順曲直本無敵於
王師而衆寡安危難預卜於人事自朝及野能不憂虞陛
下神筭無方眷謀先覺料此狂寇必合敗亡次秘策於禁
中落奇兵於天下應期撲滅萬里廓清天聲所震已龍 一作
於西海虜將之首又懸於北闕事均符契理絕名言况合
戰之時則逆風破敵決勝之後則卿雲藹空大塊資其殺
氣輪囷表其休色實惟聖感詎測神功凡在庶寮不勝抃
躍况於 一作 臣等倍萬恒品 一作 無任慶快之至謹具表
陳賀以聞

為宰相賀九姓斬送突厥首表 玄宗 前人 天寶三年

臣等伏見王忠嗣奏九姓拔悉密等斬突厥可汗首送至
朔方軍者伏以北虜孔熾其來自久憑險恃遠干紀亂

常雖聖德撫和約為父子之圖而野心凶獷不改豺狼之性既盈稔貫自速天亡頃歲已來頻貽喪敗首豪向化雖已歸降默吸述恩尚為潛竄苟合餘燼偷安絕漠陛下聖慮先覺神謀獨斷使其種類自至携離咸革面於塞垣遂傳首於軍壘以狄攻狄寧勞六月之師有征無戰豈待三年之克永罷邊圻遂清虜庭斬蚩尤而莫傳戮防風而何有豈惟率土無外用表於昌期固亦先天不違更彰於眷筭凡曰士庶不勝慶悅况在臣等倍百怛情無任抃躍之至謹奉表陳賀以聞

為宰相賀匈奴來降表

玄宗

前人

臣等伏以匈奴患遄其來自久頃雖朝廷示信約為父子之國然而戎狄無親常畜豺狼之志陛下聖謀廣運蕃略左通至道昭感神明叶贊不勞一卒不頓一兵使其種落

自相携貳今葉護敗亡殞身漠北妻子縲繫為闕俘下巢傾帝卷尾解雲散萬里無事二庭遂空曠古不賓盡為臣僕普天所覆皆入封疆諒由負德背恩自速天亡之禍固亦休兵偃甲用彰海晏之期實有無方之神寧惟不戰之勝來諸載籍所未嘗聞臣等幸偶昌期欣逢大慶忝居近密實倍怛情無任抃躍之至謹奉表陳賀以聞仍望宣付史官兼示中外

為宰相賀隴右破吐蕃表

玄宗

前人

天寶元年

臣等先在城中因奏事陛下謂臣等曰朕料至重陽已來諸軍必頻剋捷臣等欽承聖旨詎測神功近者隴右果奏斬獲蕃布支并生擒蘇毗王及鑿駕將迴劍南節度使章仇兼瓊又奏西山將士分為五道破吐蕃城堡鎮柵等四十餘所四鎮節度馬靈察又奏破吐蕃不可勝數并開護

密讖匿等數國共為邊捍者數旬之間一作三方告捷應如影響合若符契禁暴如武盡決於宸衷知來似神更超於繫表斬級獲醜陷陣隳城分南方之五將斧無遺策導西域之諸蕃仍為外蔽百戰百勝以夷攻夷高居九重懸料萬里所以彰眷略之天贊知戎之日蹙臣等忝信巡幸預奉德音踴躍之誠實倍恒品無任欣慶之至謹奉表陳賀以聞

李採訪賀收西京表

肅宗

帝宸

至德二載

臣聞夏曆其昌昇何逃罪漢維既振斧亦伏誅伏惟皇帝陛下恢正皇綱光膺帝業日月照其明略雷霆發其英斷極橫流而方割撲燎火之已焚頃者胡羯亂常嗜函矢守暴殄天物憑陵帝京上皇興避狄之仁陛下有蒙塵之難賴宸衷果火眷筭昭宣憤陵寢之懣蘇悲黎元之塗炭必

將寧膽誓使然臍不有殷憂何以啟中興之盛業不有患難何以彰撥亂之英哲步自郇邠至于朔漠撫巡城邑招致甲兵誥命俯臨三諫而登九五師徒走集一呼而踰百萬設壇拜將虛左迎師朝有怵惕之容率土下哀痛之詔六軍之號令既肅萬人之賞罰且明湯火不亂矢石何懼及清秋戎節太白方高爰整軍容順乎殺氣龔行天罰掃彼氛氛千里貔武之營百里龍蛇之陣沸若雲海聚如雪山疊揭終峯塹迴渭水關軍聲而丘陵簸盪輝兵氣而天地晦冥蠹茲兇徒猶敢猿拒鼓謀白兩來聚犬羊之羣旗靡黃塵旋就鯨鯢之戮渠魁不漏噍類無遺枝梧者面縛中軍顛背者頭懸後殿敗符融於肥水自可慙功破王邑於昆陽未云快意遂封尸於京觀旋振旅於王城啓闕千門掃除九陌祗羶腥於宮闕洗毒螫於閭閻耆艾觀迎

父思周德衣冠雨泣還觀漢儀謳吟變噢咻之聲氣象迴
嚴凝之慘廊丹霄以瞻羽衛肅黃道而復鑿與正寶位於
北辰道光主鬯迎上皇於西蜀歡展奉親永惟宗社之靈
實荷乾坤之慶臣忝陪宗室喜萬怕情無任踴躍歡抃之
至謹奉表陳賀以聞

為江淮都統使賀田神功平劉展表肅獨孤及上元二年

臣某言得田神功等狀稱官軍以正月二十六日過江大
破賊衆擒元惡於蒜山之下凶殘撲滅江介無事臣某誠
歡誠喜頓首臣聞四時成歲秋實集作為司殺聖人則
之以作五兵蓋姦宄寇賊或乘豐而起干戈孤矢亦有時
而動自陛下率遏亂略再造區宇擣擒旬始竹破瓦解最
爾狂狡敢干天誅作為長地荐食江漢乃誣矯我詔集作
命讓竊戎王師暴殄我城邑假擾我邊鄙荆吳之人若墜

泉谷萬姓業業去我集作無所陛下神聰不測眷筭無方

將欲擒之必固繼之先侈其心而厚其毒然後制勝兩楹
之下授略千里之外使神功等一戰而陷陣再戰而逐北
三戰而擒其渠魁繫頸以索覆巢傾卵集作剗野掃地如
冽風之破駭浪嚴霜之墜集作落葉浹辰之內平揚州定
淮南下朱方收三吳流亡者復故事塗炭者返壽城扇以
皇風與之更始遂令東土耆舊復見漢官威儀非陛下乃
武乃文之洪烈日用不知玄化孰能陰薦聖功如此神
集作連臣無任慶抃之至

為江淮都統使奏破劉展兵捷書表肅前元二年

臣聞聖人之生不能使大盜不起故唐虞集作之代時則
有四凶之集作列王制所以誅不恪討不庭小者市朝大
者原野姦宄草竊何代無之劉展包藏禍心為日久矣集作

久取恣姦慝乘間阻兵長驅凶徒掩臣未備以偽言亂衆
謂天命在己於是有所食淮泗鯨吞荆楚集作吳之心使黎
庶播越人神憤怒臣職司靖難敢不戮力將集作當憑廟略
以殄寇讎謹遣副使少府少監攝侍御臣李藏用屯兵
杭州伺隙進討且分據隘害以遏其唐突賊衆徂干初役
驕恣輕脫集作師輕而驕不虞我軍能折其銳也乃以今月三日
使其偽將軍張幹朱德裕集作法雲一作德容等領步兵集作七千
馬兵六百徑入杭州東門焚燒閭閻鼓譟而進藏用引其
精卒設伏險集作於逢羸師張之使入死地然後整堂堂之
陣以薄其壘使左廂兵馬使前潭州長史李登左軍左第
一將集無張巖光先鋒將李強李陵等佐之都押衙高幹
為右軍左押衙楊復和都虞候魏守寂佐之左第集作二
將皇甫山集作樞左三將梁朝康承寂左四將吳季之李楚王

顏光胤等督導軍之騎以彌縫其闕表裏合戰竒正夾攻
以將師之餘勇因黎元之積憤奮皆敢死登必爭先赤羽
交而三軍風生金鼓鳴而萬天氣作自卯至午覆而敗之
神扶電掃雷落山破嘍類無餘隻輪莫反鋒鏑之血朱殷
長江甲齊崇山尸作京觀實賴陛下聰明齊聖與日月合
照故能慮圖發於罇俎而威靈加於遠方使臣等盡敵如
拾芥成功如抵集作指掌惡氣殄殺蕩掃無日海隅蒼生比
屋何幸無任慶快之至

為江東節度使奏破餘姚草賊龔厲捷書表代宗前
臣聞皇天分時秋為司殺王者立極兵以禁暴唐虞有共
工三苗集作苗人之患殷周有鬼方昆夷之戰蓋蠻夷猾夏自
古有之自頃胡寇作逆吳越震恐龔厲父子乘間起兵劫
明州之人略餘姚之地負隘後偏作原集作阻海口憑陵江干蟻聚偷

安蠶食取集作給屬王師北伐未遑南征迨茲二年集作

侵掠益甚將擬得集作東甌故地窺南越僭跡邊邑黎庶

為之騷然臣方荷推轂之寄懷盡敵之計思所以扶乘

天威圖制遠略料其貪而無整勇而無剛鳥散獸聚不足

當堂堂之陣山潛海後篇匿不足用栢栢之師難以力制

易以計滅臣遂遣軍將潘景蘭領輜馱數十輩偽為商旅

傍山谷往來以餌之又遣軍將呂道光領陌集作刀手一

百人取其便道為伏以待之遣軍將左璋率弩手一百五

十人為左翼軍將後篇余能集作變率弩手一百五十人為右

翼皆三吳良家百越勁卒爭賈餘勇樂於公戰蓬頭突鬢集作

駭火烈相為輔車當集作敵之路又遣軍將張思覽率集作

集作刀手二集作百人為中軍操中權之制以節其進退

以三月二十九日至青煙洞口果如臣策賊遂出山先者

遇伏鼓譟合戰於是奇正後篇畢率四軍夾攻賊衆奪氣

不知所守鳴鞞雷動飛鏑雨集轉戰集作十里殺其三

百餘人龔厲尚稽天誅且偷晷刻收合餘燼八九十人更

登高岡山借集作張思覽等連弩並集作發引軍合圍天

聲揚而勇士勵銳氣作而妖星隕遂斬元元父子擒其妻

孥餘黨僵仆原隰脂膏草莽猶恐蔣潢翦蒼尚有伏姦遂

攬山搜谷刮野掃地傾其巢窟逆旆而旋累載連誅一朝

撲滅非陛下聖謨神策與天合契制勝兩楹加威後篇四海

則安能剪豺狼如拉朽掃欃槍如後篇拾芥使吳越又安江漢

澄廊臣授鉞未幾觀茲後篇成功無任慶抃集作之至謹差攝

福州泉州府別將左璋奉捷書以聞并齎逆賊父子頭奉獻伏

望後篇懸之藁街以示百姓其餘首級於當州梟示訖所獲

賊物各令分賞將士器械官收山海餘祿自取誅滅既非

強敵不足叙功謹錄奏聞

此篇又載六百八十四卷今已削去

賀表係破賊表代宗

前人寶應二年

臣某等言臣等伏見河南副元帥行軍司馬太子右庶子
 兼御史丞裴儉露布奏今年五月十七日破石埭賊
 賊方清并降烏石山賊陳莊等徒黨二萬五千五百人者臣
 聞聖人之生不能使大盜不起故唐虞之代時則有
 三苗之師姦兇草竊為患舊矣山賊方清等蕞爾狂狡敢
 干天誅聚椎剽之徒謂險遠可恃作為地豕以存食勾吳
 乃有跨據大江吞噬東土之計七州之地人罷物弊集作耕織
 百姓業全活無所陞下方銳志於偃武不得已而用師乃
 命將授略使先勝後戰故儉等役不再舉而師有成績
 巢窟皆傾俾無遺類誑誤之輩得返故業汙俗更始流人
 訖康此三代之舉也非陛下齊聖格天文思柔遠豈能底
 綏盜亂如此其速臣等幸覩成功不勝大慶臣無任抃躍
 之至

文苑英華卷第五百六十六

登仕郎胡

柯

鄉貢進士彭

叔夏

校正

賀捷二

為百寮賀僕固懷恩死并諸道破賊表一首

為崔大夫賀破吐蕃表一首 賀郭子儀破吐蕃表一首

賀擒固智光表一首 賀劍南破西蕃表一首

賀破山南賊表一首 為崔中丞賀討田承嗣表一首

賀張獻恭破賊表一首 賀取涇州表一首

賀破賊表一首 賀破吐蕃表一首

賀劍南奏破吐蕃表一首

中書門下賀雲南軍破吐蕃劍山保定城表一首

中書門下賀元誼李文通出洛州城表一首

中書門下賀汴州擒李迺表一首

中書門下賀靈武破吐蕃表一首

中書門下賀蔡州破賊表一首

賀蔡州破賊表一首

為百寮賀僕固懷恩死并諸道破賊表

代宗

元泰元年

臣某等言臣伏聞逆賊僕固懷恩以去月九日死於靈州
鳴沙縣又見成德軍節度使李寶臣露布斬逆賊蔚州刺
史曹楚玉并破党項部落收諸蕃漢官兵一作健及百姓等
三萬餘衆入邠寧節度使懷白孝德破僕固瑛下兵馬及吐
蕃斬首三千級生擒一百五十九人獲馬八百疋兼鳳翔
節度使李抱玉亦破吐蕃羗渾等三千餘衆收其軍資器
械不可勝數者臣聞積德者天下之所啓反道者鬼得而誅
逆賊懷恩者龜裘雜種出身微賤陛下以其久經驅策嘗
立功勲任以樞機一作中樞弁之上將而豺狼其性梟獍其一作為
心連結西蕃因依北虜大為人患二年于茲謂旅拒可以

偷生猖狂可以集事曾不知逆天暴物其惡貫盈故王師
未加而元兇自斃又曹楚玉去順効逆與之連衡更唱迭
和同為不道李寶臣恭行天罰遂戮鯨鯢其餘吐蕃之兵羗
渾之衆或毆役邠土或陵逼鳳翔白孝德陷之於前李
抱玉破之於後既已剪其兩翼方且覆其全軍信宿一作固非
之間數道皆捷彼進無所入退無所從掃妖羣指期非
遠臣歷考近事因知天意自祿山開釁思明亂常迄于懷
恩三凶繼跡始雖倣擾旋見敗亡社稷危而復安天地否
而重泰足明皇穹保佑曆數延長卜年之慶永代無極臣等
幸逢昌運忝列朝行慶躍之誠倍萬恒品無任歡抃之
之至

為崔大夫賀破吐蕃表

代宗

浩虛舟

元泰元年

臣某言伏見關內河東副元師朔方節度使司徒兼中書

令汾陽郡王子儀八月日奏牒今日先軍李懷光於鹽州界大破吐蕃及吐谷渾賊一萬餘衆獲馬六千七百五十疋牛羊器械未知定數者臣聞戎狄無厭厚將自斃完殘不革舉必生擒惟此犬羊屢侵疆場陛下頃雖遣將猶命緩追冀承含育之恩以變貪婪之性今乃先時入塞乘間犯邊鬼得而誅人皆自戰偏師暫出舉衆大奔係彼牛馬獲其生級數逾萬計威懾四夷陛下神化無方聖功潛被資於祕略成此殊勳臣承恩入朝次行分陝雖捷書傳慶已竊抃於道一作中而賀表陳誠願先馳於闕下無任之至

賀郭子儀破吐蕃表 代宗

于邵 永泰元年

臣某言今日吳承借至奉宣進止示臣關內河東副元師司徒兼中書令汾陽王子儀奏捷伏李懷光於鹽州界積

石川大破吐蕃一萬餘衆生擒斬首共六千餘級獲牛馬及器械不可勝數者伏以聖略遠加制勝前定神功不測告捷如期吐蕃忘國厚恩歲犯邊境陛下料其進退知其無策親以規模授於諸將以鹽夏之路地曠人稀寧語臣曰此賊秋中必來擾鹽夏今覩成擒之處果於所料之中俘馘既多羊馬甚衆此皆宸心懸照不差毫髮天威遠被克壯師徒遂令智勇雲起祇氛電掃合符聖斷有此豐功子儀狀又云計日追蹤必當再捷者臣以蕃醜久逋聖誅從此氣衰必當危解坐觀無外之慶載美即叙之勳罷柝可期戢戈有望親承眷筭忽驗於今奉覩戎捷不勝慶快之至

賀擒周智光表 代宗

獨孤及 永泰元年

臣等言臣聞征而無戰者王者之師也將而必誅者春秋

之義也臣伏見周智光傲狠頑虐昏迷猖獗集作狂敢專生殺之威以慢王度崇飾姦慝之志自干天誅陛下謂罪在已躬視人如子永言式遏之義不得已而用師而將纔受鉞兵未血刃已梟元惡之首載安舊汚之俗昔漢征黠布望塵集作陣而憂殷代鬼方積年乃克豈若陛下朝命將帥夕殲渠魁制勝神速從古未有臣等不勝慶快之至

賀劔南破西蕃表 代宗

常袞 大曆十年

臣某等言今日伏見劔南西川節度使崔寧所奏露布十一月七日於邛南大破吐蕃斬首八千五百級生擒九百四十二人獲馬牛器械以千萬計者陛下以西戎負恩連歲設備近興武旅遠饗王師故隴上或虞邛南每捷事同符契謀動鬼神凡在臣庶不勝慶快伏以西蜀一隅犬戎乘隙聖謀潛運蕃帥龔行以我同力出其不意故得邊兵無

遺鏃之費狂寇有

一作致

輿尸之凶名王首將既克俘馘要

塞堅城亦入封守神武之德莫測掃除之勢足徵天聲一臨風動萬國則方隅不擾候我綏懷夷夏大同期於指掌臣等觀茲大捷愧乏嘉謀慶躍之誠實倍恒品

賀破山南賊表

代宗

前人

臣某言中使某至示臣山南西道露布破吐蕃高安堡五百人又生擒堡使等七人又破急援兵馬二千餘人者大獲帥長驅其畜牧焚其資儲夷其堡隧獲觀慶捷喜倍一作萬恒情臣伏以狄成以來羣帥宣力陛下皆先授方略合如符契加以蕃醜東寇猶窺疆場受命獻恭掩征巢穴允膺密旨精擇奇鋒行於險中出其料外遂使恃固之壘遽復于隍將領之渠盡殄其甲猶不悔禍更招援軍以犬羊恃衆之羣當貔武輕齎之族雖終日猶闕殲耗相仍而乘夕

盡逃覆亡不暇聖謀方舉西候遂寧神筭既行北郊以靖
遠周萬里之外甫料四夷之情中詔是所征皆捷苟承
成命皆可指期故邛道拜章於前漢池拜章於復畝眷略
更布新書軍中皆必勝之師天下無不賓之虜臣幸參極
近更乏嘉猷拜舞失容以慙以賀

為崔中丞賀討田承嗣表

代宗

大曆十一年

臣某言中使其至奉宣某月日勅承嗣本輔逆臣罪當參
夷陛下垂包荒之德開自新之路假以台袞冀其俊革豈
謂豺狼之心飽而增兇動搖隣境慢易君命天下臣子雖
扼腕攘臂願食其肉畏懼陛下不敢自發今陛下寂然震
雷霆之怒下誅購之令戴段橫目莫不憤激臣受國恩守
在遠藩不得驅策駕蹇列於將臣巨猾之首竟為他斷撫
劍慙耻心鬼馳越臣又知鯨鯢既盡蜂蠆自滅陛下垂衣

裳以臨萬邦無為之政行同

一作

大舜無任慶快感憤之至

賀張獻恭破賊表

代宗

臣某言今月中使某至伏蒙聖恩宣示山南西道節度使
檢校工部尚書張獻恭所奏露布破岷州吐蕃十萬餘衆
生擒百餘人并獲牛馬及燒焚賊倉庫甲仗並盡者伏以
吐蕃背恩負約屢擾邊陲惡稔禍盈自招喪敗聖謀潛運
剋捷相仍自秋已來制勝非一頃則收功朔比今又獻凱
山南皆陛下指授規模剋期進取遂令銜命之將感義之
徒仗順爭先奉詞掩襲未鼓而收城壘既戰而殲寇
戎策備火攻威同電掃迴軍乘勝又破柘川殺獲追擒不
可勝數嘯聚之黨今已戮除焦類之餘自當殘滅廓清右
地計日可期斯實皇威遠覃眷略先定動周遺策年必有
功臣謬登階親承眷筭無任踴躍之至

賀收涇州表

德宗

帝哀

建中元年

臣某言中使王開諫李重芝等至伏奉勅旨送吐火羅王子并曹義臣家口共四十四人配漳泉等州安置伏聞大破兇醜收復涇州梟斬帥劉元壽等傳送闕下餘黨悉降西虜底定凡在臣庶不勝慶快臣聞聖人有作神契必先疑用彰眷謀小有邊患以威天下大告武成因茲斬效疑不率俾伏惟聖神文武皇帝陛下德合天地明罰以法雷霆道符炎黃有征以懲姦宄蠢茲狂狡敢拒封圻梟鏡之心不知恩愛豺狼之性輒肆傷殘聖慈以立造曲成神武不殺時寬嚴旨頻許自新益用恣睢竟無俊革然夏啓之征虓氏召六卿以龔行周文之伐密人示萬邦以整旅咸在侯甸之內亦効訓誓之勤於是我伐用張親授經略而執迷不復雖困猶闕蹙假游氣尚稽靈誅皇赫斯怒天威震

耀簡車馬以大閱命將師以長驅飛舞梯衝輒臨壁壘兇徒悚慄義士激昂梟懸渠魁檻送支黨上以告清廟下以布遐方人神豁憤朝野大慶百二之塞外虞解嚴十萬之師餘勇可息則日月所照取不來庭戎夏大同期於指掌臣謬承重寄喜萬恒情無任慶躍之至謹奉表陳賀以聞

賀破賊表

德宗

于邵

興元元年

臣某言臣聞春生秋殺天之令也撫順討逆國之教也故王者上法震耀下修典刑雖當垂拱之朝亦整干戈之用伏見今月十日神策行營節度使尚可孤破藍田賊堡生擒賊偽署御史大夫仇敬忠斬獲共二千餘人者初從摩壘旋即合圍因乘破竹之威不漏枯地之網中賀伏惟皇帝陛下聲教以文輔禍亂以武戮奄有華夷光臨統曆日

者藁爾朱泚怙亂涇原腥穢宮闕僭賊神器陰連叛將竊
緩輿屍實由逆賊仇忠敬等姦兇相資狡惡為事因山據
嶮欲抗雷霆之誅積粟稅一作稅芻議延晷刻之命殊不知
天威不遠春筭何逃未終瘝狗之狂已觸駭鯨之勢餘兇
奪魄義衆增威掃氛禔於順風復京師於不日臣謬兼統
帥一作帥濫一作濫愬禁戎矢石不親虛當坐制之地兇渠尚在終
次前驅之心無任慶快之至

賀破吐蕃表 德宗

齊映

臣某言伏聞南蠻以六月某日大破吐蕃弄視等戎擒戮
俘獲不可勝計者臣聞德之所綏在遠咸服義之所弃雖
暴必亡蠱茲犬戎取肆兇戾久稽天討時動邊塵人神共
讎夷夏同憤遂使南蠻奮旅伏羲爭先覆共保障之時奪
彼肥饒之地斬馘萬級俘計千群揚天聲於區外正王略

於殊俗自非陛下道超帝圖化協神用武先七德守在四
夷安得使百蠻稽服潛被聲教始左衽以請更俄倒戈而
効誠捨其唇齒之資為我爪牙之用雖書稱即叙詩美來
威方之聖功彼有懋德臣謬膺朝寄待位東土不獲隨側
稱慶闕庭抃躍之誠倍萬恒品不勝之至

賀劍南奏吐蕃表 德宗

令狐楚

臣某言當道進奏院收報六月某日劍南節度使常臯狀
奏破吐蕃五千餘衆生擒大首官七人陣上殺一百五十
餘人收獲羊馬四百餘頭足器械一千五百餘事者言語
遠及歡聲相接中賀臣聞順實臣道伏順者至柔而全禮
為天經無禮者雖衆必敗陛下君臨萬國天覆兆人恩覃
于幽微澤及于荒遠蠱茲蕃醜假息西陲惟天地含弘之
心未能剪滅以豺狼貪戾之性輒欲一作肆陸梁爰整其師

不攻而取此皆降眷略於天上頒明謀於閭外制士之死
命得人之歡心所以殪戎如羊破虜若蝨毆彼牛馬獲其
僕王威加于殊垠武暢于羣動自然赤山之壤可蹈青海
之波可涉必當封土刻石以垂天聲戎臣司武獲覩其慶
不勝歡抃之至

中書門下賀雲南軍破吐蕃蕃劍山保定城

表德宗

權德輿

臣某言伏見劍南西川節度使某官某所奏兵馬使宋冕
前月十八日與雲南軍合勢攻破吐蕃蕃劍山保定城當日
斬城使者伏以聲教所被遐邇大同蠹茲西戎尚有遺類
或犯亭鄣且稽靈誅陛下眷筭無窮天威遠震以夷裔感
恩之衆佐藩隅制勝之臣取以多方累獻戎捷事皆前定
必稟聖謀集作斬將奪旗出於料外堅城便地盡落敵中

通荒服會朝之途絕餘孽窺覩之際奉威懷之命以律而
臧兼夷夏之師在和而克此皆陛下神武潛運妖氛永清
由是成擒自當盡敵臣等謬當樞近愧之廟謀幸觀成功
不勝大慶無任欣抃之至謹奉表陳賀以聞

貞元十年十一月三日

中書門下賀元詔李文通出洛州城表

德宗

前人

臣某言臣等今日面奉進止元詔李文通等蒙恩宥過以
今月七日將領將士出洛州城者伏惟皇帝陛下聖神之
化懷保元元仁洽好生感深格物詛等列于守將本以忠
勞師旅之間失於慮始蒼黃之際自謂匪人士吏危疑謀
猷回適陛下以震耀所及殺傷則多曲成以誘其衷持
乂以通其變愀然軫念不忍致誅待以初心許之遷善指
期開壁率衆來朝實賴亭毒之恩再全臣子之節宥茲一
青昭示方萬著慈所弘動植知幸臣等薄虛備位台司愧無

調鼎之能獲覩止戈之慶無任欣抃踴躍之至謹奉陳賀
以聞 貞元十二年正月十三日

中書門下賀汴州擒李迺表 德宗 前人

臣某言中使某乙奉宣進止汴州今月三日擒送李迺
軍州并已寧帖者伏以聖德含弘在宥天下而匪人醜類
自抵刑章李迺本以庸微謬從軍校潛懷狂疾輒擾師
徒乘其疾病坐邀扶職怙亂以逞志專戮以作威人思納忠
義不同惡俄就械繫一方晏然雖泉鏡之心暫求假息而
鷹鷂之逐曾不崇朝衆情交欣以待朝旨一昨陛下命將
相之重撫綏是邦明書罪人且示輕典成命方下浚郊以
清聖謨炳然若合符契足使義士勵節貪夫革心稟化畏
威無有遠近 集作通 臣等謬居台鉉每奉德音愧乏嘉猷以
承眷畧無任權汴慶幸之至謹奉表陳賀以聞 貞元十二年七月九日

中書門下賀靈武破吐蕃表 前人

臣某等言臣等今日面奉德音靈武大破吐蕃擒生斬將
者伏以眷謀武經陰陽上畧兵符所授功戰多方蠢茲犬
羊尚勞燿燧羣師稟命權戒嚴犄角相因初設險於三
覆竒正合發俄獻功於七擒數首渠之首級積戎械於亭
候勝氣餘勇鼓行無前即叙可期有征斯在臣等謬居樞
掖莫効消埃每承以律之貞空荷止戈之運無任慶快踴
躍之至謹奉表陳賀以聞 貞元十四年十一月二十九日

中書門下賀蔡州破賊表 德宗 前人

臣某等言伏奉宣示蔡州行營招討使韓全義所奏去四
月二十七日於通賊吳少誠界破賊驪子及馬步軍三千
餘人賊第吳少陽棄衆奔道者伏惟陛下聖神廣運正冒
萬方而鯨越匪彘自蹈鋒刃德音累降曉告不悛禁暴安

人酌於軍志命師授律發於宸心整旅有嚴拊循決勝據
便地以三覆分銳師而九攻材官突騎奮勵精勇各行所
及莫敢枝梧奔北之徒自相蹈藉威謀克壯殺獲斯多更
候便宜續圖攻取蒙輪超乘靡不賈餘長轂鈎援期於盡
殫此皆眷筭前定純臣協心佇清淮瀆以慶天下臣等謬
君樞近喜倍集作萬恒清無任欣抃踴躍之至謹奉表陳賀
以聞貞元十年五月四日

賀蔡州破賊表德宗

張仲素

臣某言伏聞蔡州營田招討一作招討行營韓全義今月某日大
破賊軍斬首擒生其數至廣臣某中賀臣聞天覆至大負
慝者必降雷電之討君恩至重失節者須示斧鉞之誅賊
臣吳少誠輒因將帥之權遂肆豺狼之性聖恩含忍又示
招携散固執迷未即歸罪今全義親承眷旨處稟聖謨師
暫臨境羣兇授首梟斬元惡計日可期廓清淮瀆在茲一
舉臣謬忝地官之職情同率土歡欣快之誠倍百常品無
任踴躍之至

賀靈武破吐蕃表為人作

令狐楚

臣某言臣得朔方節度使李樂牒稱十一月二十日大破
吐蕃者千里宣傳三軍快抃臣某誠懽誠喜頓首頓首臣
聞天生四夷用別荒服國有二柄誰能去兵伏惟陛下臣
妾兆人庭衢六合而溟波靜息車軌同萬里清平三方底
定而吐蕃羶臊醜類狂狡陰計乘凌凍草妄竊邊疆相
鼠無牙安能穿屋羶羊羸角徒欲觸藩是以神聖啓其將
心忠勇成於士力兵旣落於天上虜乃一作果陷於彀中一作捕
口之馬僨車而繫者千蹄一作辯髮之人為俘輿屍者萬
指降旗載路棄甲滿野遙知水赤坐想風腥此皆宗社儲

靈朝廷決策破碎戎膽振騰天威凡百人臣不勝踴躍臣
某未申絲髮謬惚旌旌欣歡憤激倍萬恒品所守有限不
獲稱慶

此表合在本卷令狐楚賀劍南破吐蕃之後
元誤入六百三十七卷賀狀內今移附卷末

文苑英華卷第五百六十七

登仕郎胡

柯

鄉貢進士彭

叔夏

校正

文苑英華卷第五百六十八

賀捷三

賀梟戮叛將楊惠琳表一首

賀收劍門表一首

代李侍郎賀收成都表一首

賀破賊表一首

賀捉獲劉闢等表一首

代李尚書賀生擒李錡表一首

賀收蔡州表一首

賀誅吳元濟表一首

賀平淄青表一首

為宰相賀殺賊表一首

賀汴州誅李汜表一首

賀平党項表一首

賀生擒衡州草賊鄧裴表一首

為蒙陽公賀幽州破奚寇表一首

賀梟戮叛將楊惠琳表

憲宗

揚於陵

元和

臣某言臣得當道進奏官高振報夏州叛將楊惠琳庸賤
賤匹夫兇頑習性憑依壁壘竊弄干戈陷我邊鄙之人將流

峰薑之毒伏惟陛下道包覆育一作威貫風雷乃命戎人
恭行討罰文告纒布已見其虜離天誅未加倏從於梟戮
革車不頓饋餉匪勞宸筭不遺於指蹤王師蓋本於無戰
雖巴庸醜類樂禍一隅顧其巢幕之危因同破竹之勢效
氛坐掃仁壽可期臣職忝藩條任分師旅遠承慶捷倍萬任勇情無之至

賀收劍門表 憲宗

前人 元和元年

臣某言伏見正月二十九日制書以劉闢擢於非次授任
節旄不立朝章擅有侵軼詔命左右神策行營節度
使高崇文領馬步將士嚴礪李庸等計會討伐臣
臣又得上都進奏院官高振報嚴礪下告捷官嚴公既奏正
月二十二一作三日收復劍門破賊五千斬偽授劍州刺史武德
昭訖又夏州叛將楊惠琳授絕城孤勢窮力屈王師進龍
計已剋平凡在遠邇不勝慶幸臣某中賀惟伏皇帝陛下

誕敷玄德廣被文明寰海又寧戎夷歎附爾狂狡敢縱姦
兇藉方伯任用之資乘軍城變故之際阻兵拒命肆虐肆
隣陛下志在安人尚為含垢頃令申諭許以自新誠宜改
過感恩迷而知一作非復而乃怒情干紀長惡不悛既慝稔
而禍盈俾人怨而神怒今戎臣授律眷略遂宣迫脅者知
有所歸忠義者得以自効因利乘勝倚角攻驅固無遺鏃
之勞佇見輿尸之變臣忝職藩服受任偏師憤激之誠倍
百常品無任踴躍之至

代李侍郎賀收成都表 憲宗

呂溫 元和元年

臣某言伏見高崇文奏以九月二十一日官軍入城都府
逆賊劉闢走出見勒兵追捕者臣聞夏震秋落乃觀成物
之功善陣有征方見勝殘之理然則殺之所以生之也動
之所以綏之也氣和則歲功早就德盛則廟筭先期無遺

鍬而巨盜集作寇窮奔不血刃而全蜀底定奔走夷裔鼓舞
生靈騰瑞氣而躍祥風披慶雲集作霄而捧白日帥伏以陞
下慕臨宸極惟新度政拓跡開統之始作法定制之初而
賊聞敢犯天威首干大紀恃險與遠窮兇極暴雖禍遙助
順誠天道之必然而制勝卒全皆聖謨之自出一昨諸軍
既集鋒鏑爭先陛下以為方畧用兵觸冒官氣與勦人而
欲速寧全衆以集作而功遲遂令緩螻蟻之誅柳貔貅之銳
休養磨礪以須秋期由是感恩而思奮者萬心如一又高
崇文嫉惡太甚殺傷小一作過陛下推帛伐之義弘覆燾
之慈狂寇集作寇逆是誅吾人何罪遂令北者生致為上脅從
者獲則捨集作免之且諭鴻私仍加宴慰由是飲澤而向化
者十室而九加以聖慈曲被大信有孚當挾纊之時賜戰
士悉出內府開食黽集作之路賞降者曾不踰辰遂使昏

迷華心義勇增氣江山自拔雲雨長驅渠魁假息而逃
威士衆順風而捨伏市不坊肆巷無驚犬人蒙骨肉解倒
懸旌旗導長養之風金鼓動發生之氣然後知至仁能殺
睿略無方大典用彰神武可畏全苞形器集作氣之內有罪
必誅旁行天地之間無思不服臣謬膺重寄親奉昌期坐
觀氛祲之清日觀鯨鯢之戮手舞足蹈倍萬恒情無任慶
抃之至

賀破賊表

憲宗

張仲素

臣某言得度支使李翼與臣妻曲報劍南行營官軍大破
逆賊劉闢事宜伏承自六月十日後鹿頭城下石碑谷口
前後殺獲已僅二萬餘人今月六日又於鹿頭城下殺賊
二百餘人兼奪得一柵東川節度使高崇文便於城下頓
軍又西川賊於鹿頭城投降都虞候郝同美說賊城精兵

不下數百人其餘一二千悉是子弟鹿頭城內人心亦甚
危懼計即投降又官軍出戰賊衆大敗殺傷欲盡者伏以
逆賊劉闢愚狡狂童稔蓄兇惡脇帶州邑依阻城池背誕
皇恩自貽赤族陛下曲垂弘貸念彼遠人此賊敢肆拒張
恃茲薄戍望其峻革又已稽誅一興貔武之師果盡螳螂
之衛今則人神共怒覆載不容王師鼓行窮寇席卷傾枳
棘之巢待擒妖鳥決潢汙之水以捕涸鱗揚旆整戈指期
剪滅此實聖德遐被神武昭宣岷蜀清寧當俟旬日凡在
臣子孰不歡心某忝荷鴻私謬承朝寄無任慶快之至

賀捉獲劉闢等表

前人元和元年

臣某言得進奏官報狀伏承九月某日高宗文差兵馬使
鄺定進於彭州界捉到劉闢盧文若并家口等有招罪劉
闢及生擒外餘一切不問西川減放兩稅并割西川六州

與東川者臣聞鬼方不賓高宗用討防風後至夏禹行誅
自古聖帝明王將欲上平泰階下齊萬國未有不先正刑
罰後致雍熙者也闢構亂阻兵違天皆順聚茲蟊賊固彼
幽遐謂天可逃無罪不肆陛下斷於春略興此神兵寇壘
妖鋒駭馳電掃顧茲劇賊尚敢退藏同惡相隗偷生追孽
灌莽雖深豈網羅之能避武夫多力已梟鏡而同擒萬里
喧傳兆人鼓舞刑當磔裂罪合誅夷肆市陳原纔據衆怒
自陛下握乾御曆授籙纂圖玉燭載和金鏡逾朗至於夏
州椒擾蜀郡亂常春斬惠琳冬擒劉闢神速之効從古所
無復霽旅之威降納汙之詔滔天作逆唯罪一身念兩川
徭役之勤爰矜賦稅割六州版圖之屬以定封疆日月
發一作慶其貞暉山澤通其喜氣凡在率土孰不歡康臣謬
沐殊私叨承寄任手舞足蹈倍萬怕情無任慶快之至

代李尚書賀生擒李錡表 憲宗

呂溫 元和二年

臣某言臣得某官某乙狀報伏承今月十二集作日夜浙

西將士張子良等相率効順生擒李錡者天討有罪國無

稽誅夷夏同歡飛沉咸躍臣某中臣聞養氣方蒸伏陰不

能藏其珍必疑戰發泄以彰正陽之功至化方融大姦無

所集作隱其慝必陵犯誅夷以耀聖人之武珍不盡消生

德不遂姦不盡發聖功不成蓋自然之明銜而必至之恒

理伏惟皇帝陛下光膺駿命恢纂鴻休仁育羣生義征不

讓無與讓而誕修文德不得已而有此武功日者周歲之

間大刑再舉朔隲叛將獻首於九廟之庭益部兇渠伏鎖

於萬人之目被髮左衽且猶知懼宵形含氣孰不革心賊

錡身處人倫家承國集作籍三朝任遇五族輝光而獨藏

禍謀密聚姦黨梟琳之手旗尚在忽已發狂戮闕之刃血

未乾敢茲拒命陛下重難戎事深愍遠人先示招諭後加

討代方伯嚴兵有司調食經略纒下形勢已張果得義勇

叶心思神假手大旆迴指長戟合圍兵火之氣天連金鼓

之聲海動集作曾不終夜遂擒元兇卷有居人市無改肆

滔天之逆踰月而平去歲西征則善陣不戰今茲東代則

善師不陣有以見眷略天縱神武日新聖道久而投刃皆

虛德澤深而用力彌寡從此氛集作窮珍盡俗變風移百蠻

成冠帶之鄉五兵為耒耜之器溥天同軌比屋司封古

今一時堯舜何遠臣謬膺重寄特荷殊恩載集作逢河海

之清三觀鯨鯢之戮志深除惡義切同休歡抃之誠倍萬

恒品無任手舞足蹈屏營之至謹奉表陳賀以聞

賀收蔡州表

憲宗

劉禹錫

元和十二年

臣某言伏見詔書以唐州節度使李愬生擒逆賊吳元濟

獻俘文武百寮於興安門列班稱賀者天威遠被元惡就
誅一方既平萬國咸慶中賀伏惟睿聖文武皇帝陛下德
超邃古道合上玄臨御已來天人協贊削平吳蜀掃蕩塞
垣車書大同夷狄來貢蕞爾元濟敢懷野心輒聚犬羊苟
偷恃月陛下聖謩獨運春感潛通天助神兵人生勇氣既
擒兇逆爰集作正刑書仗三紀之連誅成九衢之壯觀宗
社昭告華夷式瞻行帛代而在禮無違烜一作威聲而何
城不剋楚氛改色淮安流漢上疲人盡霑雨露汝南遺老
重覩昇平凡在具臣孰不欣抃臣久辭朝列恭守遐藩
不獲稱慶闕庭陳露丹悃集作仰瞻宸極倍萬羣情集作
無任屏營之至

賀誅吳元濟表

憲宗

元稹元和十二年
見集本

臣某言某月日得當道節度使牒臣本州稱逆賊吳元濟

已就誅斬訖臣某中賀臣聞極遺眊於溝瀆非聖不能掃
餘沴以雪霜非天不可者神棄申蔡蓄為汙瀦五十年
間三后貽顧眇爾元濟繼為兇妖謂君命可逃以父死為
利陛下疑茲眷筭取彼兇殘不越殷宗之期遂勦淮夷之
命威動區宇道光祖宗凡在生成孰不歡抃臣忝官藩翰
不獲率舞闕庭瞻望徘徊無任踴躍屏營之至

賀平淄青表

憲宗

白居易

元和十四年

臣某言伏見二月二十二日制書逆賊李師道已就梟戮
者皇靈有截眷筭無遺妖氛廓清遐邇慶幸臣某誠歡誠
喜頓首頓首臣聞亂常干紀天殛神誅李師道苞藏禍集作
心暴露逆節罪盈惡稔衆叛親離未勞師徒自取擒戮伏
惟皇帝陛下文經天地武定華夷凡是猖狂無不誅剪兩
河清晏四海會同升平之風實自茲集作始臣名忝共理

職忝分憂抃舞歡呼倍萬恒品官守有限不獲稱慶闕庭無任慶快踴躍之至

為宰相賀殺賊表 穆宗

前人

臣某等言伏承某道逆賊某乙某月日已被某殺戮訖
皇靈震耀兇孽梟夷率土普天觀呼鼓舞臣某等誠喜誠
抃頓首頓首臣聞亂臣賊子阻兵干紀者明則有天討幽
則有鬼誅遲速之間罔不殲殄伏惟文武孝德皇帝陛下
君臨八表子育羣生合天覆地載之德順春生秋殺之令
宿寇遺孽閭然銷亡四海九州廓然清晏逆賊某乙一介
賤隸兩河叛人苞藏禍心竊弄凶器戕 一作殺 害主帥虔劉
一作剽掠 善良幕鷲鼎魚偷活頃刻所謂顛木之餘枿痲疽之
遺種斧斤 集作斲 欲加而先折鉞石未攻而自潰不有弔伐
孰知德威不有妖氛孰知神筭則天下之耳將來 集無此

之心有以知順存逆亡其猶影響者也臣伏以某乙既已
斬首某乙將何保身若不乞降即應生縛輔之或在車則
相依皮既不存毛將安附况我乘破竹被繼覆車止戈之
期翹足可待無任喜慶抃躍之至

賀汴州誅李宥表 穆宗

元稹長慶二年

臣某言伏見逆賊李宥已誅夷韓克入汴州訖一方既定
率土無虞凡在臣寮實增歡 集作欣 抃臣某 中 賀伏以汴
州扼吳楚之津梁據咽喉之要地將驕卒悍易動難安急
攻則越軼 集作逸 是憂緩取則遷延慮 集作易 變自非陛下盡
排羣議獨斷宸衷外委將臣 集作帥 敷眷等風行號令天助
機謀則何以斬此鯨鯢破茲梟鏡臣摧兇志切受國恩深
仰荷威靈倍萬常品限以符 集作符 不獲稱賀闕庭無任踴躍
屏營之至

臣某言伏奉三月二十七日勅党項剪除比寧邈靜華夏同慶道路歡呼臣某誠慶誠抃頓首頓首伏以上天有震耀殺戮王者有攻討誅夷是以不暫費集作者不久寧不一勞者不永逸伏以自古處夷狄於中華未有不為患者春秋時長狄攻魯比戎病齊破衛凌燕侵秦撓晉西漢趙充國納先零於內地東朝馬文泉置當煎於三輔自後熾大侵亂關中戰爭十年騷擾四海凌逼京邑發掘園陵改頽不生終不能滅後至曹公因匈奴衰弱分為五部處在汾晉散而居之元海傑然首亂華夏中原喪沒凡數百年國朝貞觀之初突厥破滅太宗或彥博之封口忽文貞之成筭處其降衆置於河南不數十年果殘燕趙與師命將輸穀饋財天下騷然始能殄滅是知古今夷狄處在中土未

有不為亂者伏以党羌雜種本在河外生西北之勁俗稟天地之戾氣為西戎所感舉種來降國家納之置於內地爰受冠帶兼伏征徭角格音既成觝觸是務天寶至德之際北燕偏重中原一撤大曆建中之時逆胡餘波巨盜再起党羌因此亦恣猖狂免伏鳥飛為戎虜之耳目狼心梟響作郊畿之殘賊比以迴鶻未殄吐蕃正強且須羈縻未可重檄於是邊疆日駭種類歲繁每至勁弓折膠重馬免乳以魁健之質張忿鷲之兇劫饋穀以焚舟殺輶車而閉道衆虺盤結羣犬呌牙依據深山出沒險逕近在宇下游於穀中難艱以來不能剗削伏惟聖敬文思和武光孝皇帝皇天縱聖赫日資明威極風霆謀先造化潛運眷筭獨决神機箕宿禡牙狼星欽角戊日禱馬太白揚眉按瓊而邊事無遺聚米而兵形盡見披其要地禱以奇兵獸窮搏

人鹿急走險集作囊封赤白雜沓維來雖走檄書遠近同
至蘇辛李慕傳鄭甘陳十萬齊呼四面同入行軍猶集作
枕席之上敗虜於阻險之中或以利戈春喉或以長矛挾
脅僵屍集作疊千山之草木盡集作腥霆電轟喧萬里之威
稜大震詩曰不弔昊天亂靡有定此言中國不振蠻夷入
伐下人號天以告亂也復曰宣王薄伐小雅盡興是知武
功不成文德不洽臯陶無遺之戒史佚非類之言若不殄
除何為家國自此兵為農器革作軒車泥紫金於長山沈
殘戎於青海天覆盡得禹畫無遺統華夏為一家用夷狄
為四宇萬物由道百度皆真遠超三代之風使無一人之
獄臣僻左小郡一作樸樾散材空過流年徒生聖代尚能
為詩見志作歌極情上詠神功庶垂後代限以宇土不獲
稱慶闕庭無任踴躍屏營集作之至謹奉表陳賀以聞臣

誠慶誠抃頓首頓首謹言

賀生擒衡州草賊鄧裴表

宣宗

前人

臣某等言伏見湖南都團練使奏生擒衡州草賊鄧裴文
徒黨等伏以湖湘早耗百姓飢荒遂有姦兇敢圖嘯聚今
承擒滅已盡根株臣等誠歡誠抃頓首頓首臣聞三代之
英兩漢之盛姦宄亂常之類挺災構逆之黨乘間即有遇
隙便生伏惟聖敬文思和武克孝皇帝陛下威極風霆德
滋雨露正開壽域盡納羣生永戢干戈將臻富庶逆賊鄧
裴鯁爾小孽取因艱食漸誘飢人剝亂鄉閭陵驚郡邑徒
堅黨合事鉅寇牢或據深山或閉官道遂使湖嶺之外人
不聊生慎由指揮義徒總齊武士仰憑睿筭遠伏皇威不
經歲時盡剪豺虺一作已寧於朔北妖黨復殄於巴
西今擒鄧裴一清湖嶺用夷狄為四宇統華夏為一家言

念秋毫無非帝力臣等備位台鼎日奉聖謀無任慶抃歡呼之至

集作抃舞歡呼踴躍之至

為榮陽公賀幽州破奚寇表

李商隱

臣某言臣得本道進奏官某狀報某月日幽州節度使張仲武奏破奚北部落及諸山奚除舊奚王匿朗所管外殺戮首領丁壯老小并殺獲牛羊焚燒車帳器械等計二十萬刺史已下面皮一百具耳二百隻奚車五百乘羊一萬口牛一千五百頭者天聲遠疊廟略遐宣集作虜獲於寧臺赤夷俘於燕路臣某中賀臣竊窺舊史逖聽前朝有天子憂邊清宵輟寐將軍出塞白首言歸至乃或勝或奔一彼一此竟困寒郊之柝那停絕漠之烽猶叙烈旂常告功祧廟用其豐勝謂曰難能况幽朔巨都全燕重地存臻奚寇猾亂華人田讓之獲集作鮮卑莫能深入祭彤之軍遠

水唯遣相攻近歲已來為患滋甚是單于傾羅之路懷駒支漏泄之姦張仲武重感國恩習知邊事同三師而隸楚倅五餌以開戎乘其囂惰之時俄得剪除之便燕犀哀掛冀馬潛羈超集作距投石者動過千羣戰手科頭者略輸萬計坎三鼓而河流自却聲六校而屋瓦皆飛自使鴟懼喪林免忙迷穴無舟掬指有地僵屍未驚紫陌之鳥前軍已蹙不啖淮山之鶴後隊仍窮遂分袁尚之頭顱仍裂蚩尤之角解穹廬落燼同甲揚灰山積雲屯大收其車乘角羸耳濕盡獲其牛羊柳水載澄桑河無事爰施疑吉語入解皇威此皆皇帝陛下功格上玄運膺下武授茲成筭于彼當仁震肅九圍蕩乎萬國昔艱難云始胡塵首起於盧龍今開泰有期而漢將先清於涿鹿人謀允若靈貺昭然固已上慶祖宗下光編策綠圖洪範競三古之殊尤玉檢金泥有

百神之靈行符臣雖當防邊不介邊陲空增氣於懦夫實叨
榮於下將日圓千里天蓋九重奉一月之捷書唯知抃蹈
獻萬年之壽酒尚隔班行念風水於遐潘寄夢寐於宣室
無任望闕結戀之至

文苑英華卷第五百六十八

登仕郎胡 柯

編貢進士彭

叔夏

校正

文苑英華卷第五百六十九

表十七

雜賀一

(北卷英華所編失
年代先後今正之)

為杭州崔使君賀加尊號表一首

賀加天寶尊號表一首

賀冊尊號表一首

為河南盧尹賀上尊號表一首

賀新樂表一首

為雍州父老賀纒金駕停幸洛邑表一首

為何舍人賀於梁王處見御書雜文表一首

為韋右相賀拜洛表一首

賀納諫表一首

為秋官負外李敬仁賀聖躬新牙更生表一首

賀聖躬痊復表三首

賀聖體平復御紫宸殿受朝賀表一首

為安平公華州賀聖躬痊復表一首

為杭州崔使君賀加尊號表 武后

李嶠 延壽元年

臣某言伏奉五月十一日制書陛下俯順郡情懋膺大典
垂光休於百代被鴻私於萬族凡在含生孰不慶幸臣某
中賀臣聞大朴既謝旦昏之迹已殊至道不追王霸之風

且雜雖宗號廣溢逶享於尊名而德薄政衰不一作非光於

神器一作氣伏惟越古金輪聖神皇帝陛下承大雲之法記

應榮河之寶籙以天上天下之尊為隆平太平之主不言

而理三階正而六氣調不怒而威萬寓清而百蠻服延富

壽於和樂制雍熙於易簡懷恩慕化之黨候雨占風疇德

瑞聖之符非煙若霧青襟詠歎於庠塾黃髮謳吟於衢路

固可使堯舜擁篲禹湯扶轂踰賢劫而首唱觀梵天而高

視豈一作三域五邁昔超今而已哉嘉號初登殊章一作備

舉鋪帝谷而建皇極大寶重光撫乾軸而正坤維洪鑪再

造仙渙與祥飈俱動湛恩將存雷並作緩姬文之獄既削

爰書錫漢后之醑且頒戎級滂流之澤出九掖而浸群方

抃躍之音自三川而周四海加以宗祇肅於梵宇致嚴恭

於清廟申寬舉滯而有善必甄享德報功而無文咸秩規

模彛而洋溢道德紛一作純而布護豈徒朝野稱慶觀美化

之惟新故亦神祇祥見鴻基之載永臣叨延龜組謬一作分

虎符千年有遇更逢閭闔之初百辟相歡不預趨馳之

末瞻雲路而式作仰天庭而載佇踴躍之懷企聳無極不

任臬藻悅豫之至謹遣某官奉表陳賀以聞

賀加天寶尊號表

玄宗

李邕

天寶元年

臣邕言伏奉今日恩制萬方士庶九士軍戎昭洗宸波
光被聖渥臣誠歡誠喜載抃載躍頓首頓首死罪死罪臣

聞沐雨露者草樹自樂何陶荷釣者動植皆春故知則而象
之守而行之所謂則天之明立人之極有慶斯大無得一作
而名者也伏惟陛下尊崇聖祖肅恭道教子物天德序位
代工惣三五之妙勳統億兆之全業戈甲謚息華戎底平
故得真容慶應潛通帝夢寶符靈貺允叶神心加號所以
發祥郊天所以昭報大禮盛事光赫旬時作解周仁廓開
宇宙天稟類表 稟稱雲紀變名風物光華再馳暉於日月
河山保界重賦質於乾坤同一氣之逮類表 初與四時而
浸遠天長地久呼萬歲於大年國秦朝歡舞九韶於聖主
一作 臣忝私守郡常荷載天空馳就日之誠未盡歌雲之慶
無任欣躍踈抃之至

賀冊尊號表 憲宗

韓愈 元和十四年

臣某言伏聞宰相公卿百官及閔輔百姓耆集作老等

以陛下功崇德鉅天成地平宜加號於殊常以昭示於來

代

集作載

陳情懇懇到再三

集作陳情懇懇到再三

陛下仰

乾稽文

集作符

府順人志乃以新秋首序今月辰吉發揚

鴻休膺受顯冊天人交慶日月揚光寰海之間含生之類

抃歡踴躍以歌以舞臣某誠喜頓首頓首臣聞體仁

長人之謂元發而中節之謂和無所不通之謂

聖妙筭無方之謂神經緯天地之謂文戡禍亂之

謂武先天不違之謂法天道濟天下之謂應道伏惟

元和聖文神武法天應道皇陛下子育億兆視之

如傷可謂體仁長人矣喜怒以類刑賞不差可謂發

而中節矣明照無私幽隱畢達可謂無所不通矣

發號出令雲行雨施可謂妙筭無方矣三光頌軌

草木遂長可謂經緯天地矣除剗寇盜宇縣清夷

可謂戡定禍亂矣風雨以時祥瑞輻湊可謂先天
而天不違矣國內無飢寒四夷皆朝貢可謂道濟
天下矣衆美備具名實相當赫以魏巍超今冠古
方當講明堂璧雍之事撰泰山梁父之儀搜三代
之逸禮補百王之漏典時乘六龍肆觀東后微臣
幸生聖代觸犯刑章假息海隅死亡無日瞻望宸極
心魂飛揚有斥集作棄之非集作無自新之望
曾不與鳥獸率舞蠻夷縱觀為此銜酸抱痛負集作
且慙無任感恩懇懇迫傍徨之至謹奉表陳
賀以聞

此篇元誤編在六百三十五卷狀門今移入于此

為河南盧尹賀上尊號表武宗

李商隱會昌五年

臣某言臣得本道進奏院狀知宰臣某等奉至尊號以先

洪休耀列聖之眷圖表三宮之慈集作訓凡在生物孰不

歡心臣某中賀臣聞善言天者必推功於廣覆善言日者

必詠德於大明然後物仰玄穹人知景曜皇王擬象今古

同規伏惟仁聖文武章天成功神德明道大孝皇帝陛下

體天垂蔭法日流輝弘上德以續戎啓下武而膺運頌從

臨御族致洽平雨塊風條特推順適苗螟葉蟻坐致消亡

是以銀甕石碑非煙浪井神而告瑞史不絕書且僊鬻為

災周秦之策金行火運不絕於侵陵瀚海陰山幾淪於約

誓而敢乘襄運來犯昌朝陛下乃赫以天威授之完略一

伐而于單僅免三鼓而貴主來還滅大邦之仇讎摠累聖

之忿憤及晉陽逐帥代馬新羈陛下又濬發宸襟委諸廟

畫浹辰而前軍就路逾月而元惡膏磔靜豐沛之遺疆牟

陶唐之故俗蕞爾潞子復生孽童脫縲莫思止柩拒詔據

九折之險有五州之人數澤逋逃糞土租稅陛下又遠揚
神斷深詔徂征合鎮魏之強藩出韓彭之銳將夷其巢窟
去彼根株清明皇之舊宮復金橋之故地曾非曠歲集此
正功固已至化潛融事光於玉版去機獨運理溢於瑤編
况又志切希夷道存冲漠慕遺蹤於姑射載動堯心思順
請於崆峒勞斬拜遠惟集作揚聖祖載佇神孫俾異法皆
祛多門就掩麟殿正玄元之座鳳書招黃老之徒將以休
有萬靈臨茲兆衆使咸踐壽昌之域俱遊富庶之鄉巍乎
煥乎盛矣美矣故得人祇叶欽華夏均懷願加尊顯之稱
以報財成之美宰臣等果能陳大義允建鴻名伊尹暨湯
咸有一德咎繇謨禹克讚九功述盡善於王猷標具美於
帝籙南山稱壽北辰降光永終一作於無極之年長奉上清
之號臣幸丁昌運方守洛京空深戀闕之誠不在稱觴之

列舉頭見日雖悲千里之遙側管窺天且慶百生之幸無
任徘徊望闕蹈舞踴躍之至

賀新樂表

周武帝

庾信

臣等言臣聞天地順動則雷出為豫聖人功成則風乎有
節故六德在咸池之管山谷可調八風入承雲之奏人神
不雜我太祖文皇帝體國經野設官分職變魏作周移風
正雅衣裳而朝萬國珪璧而會諸侯至如經綸圖籍校讎
煙燼樂正無缺章秩宗無廢典豈但商頌十篇得諸太師
之室虞書五禮取於恭王之宮伏惟皇帝以下武嗣興中
陽繼業運日月之明動淵泉之慮律曆著微無煩於太史
陰陽晷度躬定於天官故得參考八音研精六代封晉魏
為二王序殷周為三恪雖復朱干玉鐻尚識典刑素鞞纁
裳猶因推擲未若山雲特起八卦成形鳳翔飛九州觀

德改金奏於八列合天元於六舞聲含擊石更入登歌調
起初鍾還恭玉管足以感天地而通神明康帝德而光玄
象昔者齊居玄扈為曲在於雲門師渡盟津習舞歸於山
立遂乃包括三名克諧一代作者之謂聖天之所啓乎豈
惟路鼓靈鼗鼓空桑孤竹廣矣大矣輪焉奐焉是知零陵孝
康空傳玉管始平太守虛稱銅尺臣等並預鈞天同觀張樂
軒墀弘敞欄檻眺聽崇牙業猛篋趙趙翠鳳揚於靈鼗
樹鼓杳冥雲霧蕩薄丘陵醴泉與甘露同飛赤鴈與班麟
俱下聘魯請觀理當見其盛德適齊忘味定是知其盡美
昔淵魚聽曲尚得聳鱗極馬聞絃猶能仰秣臣等誠愧知
音敢忘悅豫若使詳其音律是所邈然但能記其鑑鑄於
茲為幸不勝慶悅之誠謹詣朝堂奉表以聞

為雍州父老賀鑾駕停幸洛邑表

高宗

李嶠

臣某等言伏見今月日詔書鑾駕停幸洛邑臣等輕生多
幸淺識逢時青襟遊聖人之園白首覩太平之化常恐消
埃難効溝壑易期所以眷戀軒宇徘徊霄極日者農秋輒足
缺庶政微勤天皇損上益下忘身徇物便欲移鑾徙蹕望
河洛之封畿削賦蠲徭罷咸秦之力役臣等仰銘玄造退
揆愚心誠以天府膏腴帝畿殷實雖菑畬之務稍闕於千
箱而衣食所資尚豐於累載况惇嫠凋給家室乂安何容
使宸座鳴謙聖躬服劬勞之事衡門高枕臣等蒙過差之
澤是用低徊跼蹐抒拙慙惶方且選議蓬茨摧中襟於白
屋因言槐棘升下情於紫路不謂乾心府應聖德潛融降
六璽而紆紘迴三光而改照人欽天從既通誠感稟靈含
氣疇非慶躍竊惟政途非一朝務有恒國尋不可以思廢
家征不可以事闕天皇愛精願壽答兆庶之歡心臣等畢

力窮年供忝授之餘稅庶得百度無曠九功惟序伏望皇
明乃矐輿輦少安則海甸蒸人撫耕鑿而知勉涓瀆遺老
仰雲天而識庇無任踴躍之至

為何舍人賀於梁王處見御書雜文表 前人

臣彥先等言臣等於梁王三思處伏見御書雜文尺牘凡
六十卷跪發珍藏肅承瑤檢天文景錄壁合而珠連聖札
雲迴鸞驚而鳳集究黃軒鳥跡之巧殫紫府結空之勢偃
波垂露會寶意而成一作威新半魄全曦象天形而得妙固
已竒蹤絕俗美態入神掩八體而擅規模冠千齡而垂楷
法重以語成四教文物愬六詩聲咀徵而含宮旨懲遠而動疑作勸
德用之於國敦風俗而厚人倫行之於家習雍和而崇孝
敬惟彼良翰特蒙殊獎銘厚渥而歡悚竭深誠而捧戴是
用編之玉軸勒以銀繩盡罄梁珠特裝瑋習之匣愬一作收

陶壁用飾瑠璃之筭彫鏤千品緹巾萬龍衣甘云香却蠹芝
髓封珍寶之精下燭西崑之岫文章之氣上躔東壁之象
實可謂天下之妙迹域中之竒觀者焉臣等幸遇休明叨
延簪笏駭矚非常之瑞欣逢不世之寶足蹈手舞徒懷鑽
仰之心夕死朝聞豈識名言之地無任抃躍歡欣之至謹
奉表陳賀以聞

為韋右相賀拜洛表

武后

垂拱四年

臣某言伏奉五月九日制書將拜圖温洛肅事南郊御朝
堂列羣后恭聞大禮不勝慶躍臣某中賀微臣泛覽金冊
詳窺玉版商較於七十二代下上一作於於數百千年以義
軒稱皇所貴者河圖龍出以堯舜稱帝所尊者洛書龜負
猶未聞總集靈命弘敷聖業籠大勛於萬古盡能事於一
朝非天下之至神其孰能與於此乎伏惟皇太后陛下肅

膺遺託光踐丕基皇業高於補天母德隆於配地東西浹
洽窮八際而流河海南北貞明洞六幽而懸日月淹中訪
禮汶上披圖情每畜於布政義不忘於宗祀於是全謀聖
造異制神行迎四氣而䟽闢向八風而闢牖上圓法天煙
雲為之動色下方象地龜玉所以呈姿玄功叡範洋溢於
歌頌祕采靈文昭彰於篆刻豈白銀青玉唯傳地理之經
黃魚黑鳥但播一作稍天乙之號可以答上玄之命可以光
累聖之隆制有司陳法駕用禋柴之典採沉璧之儀然後
負黼衣而朝百神垂衣裳而會萬國不亦休哉不亦盛哉
臣忝預出征恨深畝帶河西弔影銜珠之託未申洛北馳
心拊石之歎何極不任悚懼之至

賀納諫表 代宗

常袞

臣某言伏以補闕姚南仲何士幹等上封事恩命特與改官
及進階兼賜章服又內侍吳承倩奉宣聖旨令兩省供
奉官數論得失無有隱諱者德音霈然公謹知勸羣情震
喜中朝動色易曰感人心而天下和平今之所感可謂深
矣臣謬當丞弼之任不能有所啓聞踧踖自慙惶汗失次
然以聖德之弘納天聰之宏博欣奉踴躍不勝大慶中賀
臣聞從諫則聖帝之德也有犯無隱臣之分也故上聞逆
耳之忤受而不疑下有殺身之益死而無悔禮曰天子齊
戒受諫又曰近而不諫則尸利帝道莫盛於有虞書之美
舜則曰嘉言罔迥伏萬邦咸寧王道莫過於有周詩之頌
文則曰思皇多士惟周之禎漢家雜之以霸亦詳延極諫
訪求得失國朝稽合皇道肇脩人紀貞觀故事布在典章
危言正論聞于天下陛下以欽明御曆紹休祖業仁聖廣
大天覆地容求賢進善有如不及每覽羣臣奏議日昨忘

勞穆然嘉納不令夙退順顏者必遠忤旨者必容而芻蕘
之可擇庶藜藿之蕭採少有所補從之如流雖委輅論都
即日西行伏車頓首路迴乘輿方之於今未云其速而又
煥發宸旨宣導近臣直言者賞之於朝罷奏者責其所職
以明沮勸大悅人心則太平雍熙之化溥將四表矣可以
動天地可以服一作戎夷雖上古至理納諫達聰坦然不
諱未覩今日之盛也望請宣付史官光垂帝錄臣職在潤
色敢揚鴻休無任忻躍之至

為秋官員外李敬仁賀聖躬新牙更生表
武本嶠

臣敬臣言昨因奏事蒙恩入對伏見陛下所御湛露殿三
間兩間雨漏無所脩葺又因顧問之次伏承聖旨云去年
口中生一齒今年又生一牙臣伏以聖德謙冲躬自菲薄
富有四海尊居萬乘而中堂外扉不闕一作於寒暑上棟

下宇未離於燥濕降紫宸而齊白屋屈帝力而用氓心雖

昔之采椽土階茅茨蒿柱漢皇之儉用一作夏后之卑宮

六籍之所讚揚百家之所記述曷足以希風上聖仰帝

道之崇高擁篲後塵望皇輿之軌躅臣又聞之易有四營

金牙為壽考之象詩有六義玉齒載神仙之謠還年而編

具不虧却老而瓠犀仍出亦有堅而不脫聞於導養之方

落而更生得自靈飛之散斯並道藏幽記術隱上清誠福

力之所招匪勤求而可致陛下端莊靜默寬惠仁慈抑嗜

愆而省煩勞恤飢寒而甘弊陋宜其延既宗社受報烈元

集天地之休和享靈祇之介祉故得百祥護體五福登年

同鎬邑之夢齡邁鑣宮之錫壽豈徒一人有慶長居北極

之尊寔乃萬姓同歡共仰南山之固臣謬以庸賤獲奉

宸嚴欣聖壽之延長願稱大慶見宸居之挹損思揚至德乞

宣示海內仍錄付史官庶使六合之中知寶箚之方永百代之後頌休風而不絕無任抃躍之至謹詣闕奉表陳賀以聞

賀聖躬痊復表代宗

常衮

臣某言臣一時對親一作見奉聖旨伏承御膳過時微似煩

熱臣等退用兢悸不安寢興齊居潔誠思獲休問適中使

吳承倩至奉宣德音今已校退卿等不須憂者恭承眷旨

俯協歡心欣抃失容蹈舞不足伏以陛下裁成二氣聰斷

萬方每積憂勞載勤早曠英華作宵祈以下祈人命上贖聖

躬責在微臣退增兢懼今導暑過候涼秋戒期方助穆清

上滌玄慮伏惟簡臨庶政保合大和以答天地穰穰之福

以慰臣子顛顛之望天下幸甚無任喜慶踴躍之至

同前

此篇六百三十五卷重出今已削去

于公異

臣某言今月十七日衙官吏萬頃奏事迴伏奉手詔伏審

聖躬頃暫乖理今悉康平凡在臣子不勝抃躍中賀伏惟

皇帝陛下自天生德紹聖垂衣類表運啓握符已慶無疆

之壽疾稱物藥果從有喜之辭歡初洽於朝廷慶旋周於

海內臣伏以天心恭慎庶政殷繁既當痊愈之初宜加願

攝之道然猶日旰對奏未明求衣理或至於憂勤事終干

於思慮恐乖將候竊未遑寧伏乞朝廷之宜付之宰相討

代之任仗彼戎臣從容聖心消息玄化為宗社自愛委諸

有司幸甚幸甚臣蒙國寵榮輒露誠懇伏惟察納表臣愚衷

同前

前人

臣某言今月七日中使至伏奉勅書手詔慰諭臣者伏以

聖躬頃乖願攝類表有不安景福無疆旋亦康泰屏營

捧詔且喜且驚臣聞子之事親出告及面臣之事主移孝

為忠君親之間其體無異自宜問安內豈增慶寢門平居之時猶無闕禮乖禮之後豈合皇寧又臣聞勤則近憂憂則生疾豈陛下以萬方黎庶尚未和平三輔甲兵猶從征討此皆臣下之過遂煩君上之懷臣特荷國恩超踰齊輦死生不繫於己命休戚實同於國家况聖壽日躋皇符永固雖禎祥合慶祚必壽於南山臣子馳誠心豈離於北闕類表伏以聖謀思振邊徼正安輕騎無信宿之程郵館無兼金之費臣欲旬日之內輕行入朝陪列庶官恭承眷旨審聖質之安否布微臣手隸誠伏乞矜允遂臣愚懇

賀聖體平復御紫宸殿受朝賀表

元稹

臣某言今日得上都進奏官報稱昨日陛下御紫宸殿受羣臣朝賀伏審聖躬萬福親見百寮率土皆歡溥天同慶臣某中賀臣聞兩曜有明晦所以成其不已四瀆有盈縮

所以成其不竭不有燎火無以辨玉質不有霜霰無以驗松心是以軒轅神僊然後夢華胥之遊秦穆疾寐然後享鈞天之樂堯以癯瘠而為聖禹以胼胝而稱功斯皆因疾成妍以勞逢福非臣臆度敢進瞽言昨者聖體不安纔經旬日穆卜言吉忽藥有喜此所以表北極而表尊配南山而永固者也况日臨黃道萬物皆榮帝御紫宸千官畢賀臣限以守符外郡不獲稱慶明庭空懷鼓舞之心莫備賡歌之末臣某無任跳躍徘徊瞻望懽忻之至謹差知衙官劉宗奉表陳賀以聞

代安平公華州賀聖躬痊復表

宗文

李商隱

臣某言今月某日得本道進奏院報以躬痊和右僕射平章事臣涯等奉見聖躬一作奉賀訖社稷殊祥生靈大慶臣忝分朝寄回奉國恩無任抃舞踴躍之至臣聞天普覆也

應運而健若龍行日至明焉有時而氣如虹貫伏惟皇帝
陛下道超普覆跡邁至明思社稷集作宗社之靈惟德是輔念
蒸黎至廣以任為憂求衣未明觀書乙夜壽域既勤於躋
俗大庭微闕於怡神是以自北陸送寒斲停禹會及東郊
迎氣爰復老姿四海方來百辟咸在六幽雷動萬壽山呼
唯臣獨以一麾載離雙闕犬馬之微誠切篤鴻之舊列難
階提郡印而通宵九驚對使符而一食三起今幸以俗
臻富庶年比順成伏惟稍簡萬幾以迎百福託燮調於彼
相責綏撫於列藩承九廟之降祥副兆人之允望臣某不
勝懷慊之至謹差某奉陳賀以聞

文苑英華卷第五百六十九

登仕郎胡柯

鄉貢進士彭

叔夏

校正

文苑英華卷第五百七十

表十八

雜賀二

為宰相賀趙郡鑄天尊及佛有諸瑞表一首

為宰相賀開元寺鑄釋迦牟尼佛有白光等瑞表一首

為宰相賀宮人夢玄元皇帝應見表一首

賀新殿鍾鳴表一首

百官賀佛放光表一首

為汝南宮賀元日御正殿受賀表一首

賀大衍曆表一首

代百僚賀放浙西租賦表一首

為杜相公賀恩賜淮西粟帛表一首

中書門下賀柳情復膳表一首

代李侍郎賀德政表一首

為宰相賀趙郡鑄天尊及佛有諸瑞表

玄宗

孫述

臣等伏見趙郡奏鑄等身元始天尊其日天氣晴和祥雲散彩又開模未畢先出白光尊容漸見毫相圓滿其花冠白色如玉遍身衣帔自然雲霞眉上有兩點白光流轉照耀又鑄等身釋迦牟尼佛螺髻兼遍身自然玉色唯頂至面為紫金色聖情弘道天心護法爰降宸儀將崇寶相鑄寫之際禎祥屢臻初發止

一作

於上京遂呈祥於外郡金

姿玉色不做琢磨霞帔霓裳非因藻繪見祥光於眉宇生瑞氣於雲端曲示明徵宛如合契玄貺稠疊用彰萬億之期蒼生何幸盡登仁壽之域臣等忝奉

一作

軒墀倍深欣慶無任抃躍之至謹奉表陳賀以聞仍望宣示朝廷編諸簡冊

為宰相賀開元寺鑄釋迦牟尼佛有白光等瑞瑞表

玄宗

前人

臣等伏見開元寺所鑄釋迦牟尼佛身現金色頂含白光發濃紫於聖容散純黃於佛體未加瑩飾已成相好殊祥異應昔所未聞伏以聖人為心玄妙莫測至誠所感靈變無方陛下子育羣生弘修正教寫真容於法界傳寶相於恒沙洵崇建已來禎祥

一作

畢集自有神通之助豈資人

為宰相賀宮人夢玄元皇帝應見表

玄宗

前人

臣等昨因奏事親承德音宮中有一婦人性頗好道然未全通悟數日已前忽夢玄元皇帝慇懃教誡道法尚未盡解遵承無何又依前夢見大被呵責遂以水巽其兩日因而喪明比覺後都無所見然始責躬罪已精祈至真又夢

玄元皇帝教之曰汝可見吾孫自當立愈其婦人曰不知
吾孫是何人曰汝皇帝是也汝至酉時可見當施其法使
汝知驗至時宮中數人共扶見朕朕為潔誠作道法救療
其目須臾自開平復如舊聖祖靈感昭然合符與卿等同
慶者伏以混成莫測玄元闡其教衆妙難名陛下光其業
二聖表德千古叶符將告天休遂憑宮女乘恍惚而為夢
在希微而有聲不因其言孰報貽孫之慶不開其目何彰
救物之慈法事既陳靈徵果驗能使病者復歸其明當聖
躬本命之時合烈祖玄通之契事且符於乂視理仍叶於
常存殊尤之祥載籍未有臣等忝跡樞近親奉德音慶悅
之情實倍恒品無任抃躍之至謹奉表賀陳以聞

賀新殿鍾鳴表 玄宗

李邕

臣邕等言伏見昨宣示於新殿為萬祈禱神鍾自鳴是

知聖作昇聞天意下降道開皇極潤及生人臣等中賀臣
聞光覆動植者莫如天臨照幽遐者莫如日自非齊聖妙
用曷以則而象之玄化至德曷以感而通之伏惟陛下道
心冲叶神教昭宣以四海為家萬人為子寧恐水旱遽有
干戈勳勞所以恭祀百神用祈五福德澤被物聖靈動天
眷情注於一時景鍾鳴於別殿夫衆者萬有也廣者四維
也今陛下惣萬有一四維潛運方寸之間充塞宇宙之外
則何聖不鑒何神不昭豈惟一鍾乎况南面之位屈陛下
之至尊西方之金啓陛下之本命非無情之應是有由而
來自然羣龍扶持九天欣載保億兆之元后登千萬之永
年時觀雍熙代偕一作仁壽此天所以告鍾所以鳴臣等
幸朝上京欣遭大慶一舞一蹈未極臣子之心再詠再歌
徒知天地之德無任抃躍之至

賀感夢聖祖表 玄宗

前人

臣邕言伏奉今月 日制書至德感神通夢聖祖

一作聖祖通夢告

以莫大之福示以無疆之期上賀國歡不敷人願以抃以躍且舞且歌臣某 中賀 臣聞百川所歸者謂之大海萬有所仰者謂之聖人今四海獲安聖人致壽臣子之願允塞乾坤之應克諧粵自書籍已來感慶之深福佑之盛未有如斯者也伏惟陛下道用御天德心子物事無事以集休明至明以玄悟人天乃接福貺爰臻故得真仙見靈異相昭應言皆合天心證非外將恢弘聖慮昭自宸衷啓之大年授以元祐麻姑觀海歷歲彌長王母記苑與時無準則幽明所載宗廟所鍾兆庶子孫百靈齊集知億年之永記沐萬代之延休草樹自榮魚鼈咸若五風異色四氣同和鼓天地之大鑪鑄邦家之鴻業八極猶小不足受其禎符

萬物每輕不足答其誠造况卹獄宥死符以再生寵賈達人宴以旬日耆艾衢陌工賈旗亭高興太平之時歡言上古之化撫家族以自慰詣州邑以相誇官不驕人人不畏吏識天之覆煦焉若春惟聖之慈陶然如醉無任抃躍慶喜之極謹附表陳賀以聞臣邕誠歡誠喜頓首頓首

百官賀佛放光表

常袞

臣等言今日董秀奉宣文殿御功德佛放光明六宮及諸王公主并近侍等並觀其光從三更四點直至四更猶在臣聞明主之理本以庇人大聖之教先於極物合若符契感而遂通伏惟陛下以道法天以心證佛措六合於無事納羣生於度門薰然慈心在宥天下滌慮恭默齊於穆清以四海之尊勤三乘之法故得大雉應見變化無方毫光破昏金殿如晝照恒星而奪彩混圓魄而一色曠代之

瑞天人咸覩玉漏將盡銀河以低仰光明而無際知皇劫之彌遠臣等謬忝樞近倍萬恒情無任慶抃之至

百官賀朔旦冬至表 太宗

許敬宗貞觀十年

臣聞乾坤資始上元開曆象之端日月還流朔旦正璇衡之本事體有形之表理遂無物之先故能運彼玄樞財成庶類麗茲黃道孕育群生惟聖則天允執在躬之曆惟皇作極必叶理端之契所以書稱敬授易曰明時克正隆平無非此道伏惟皇帝陛下聲凝祕籙功弘造化縱如神之玄覽體不言於四時發就日之光華同無私於七曜階冀徇晷阿鳳吟辰元精究開闢之初握先窮名數之始裁炎涼於玉琯節雨露於金渾道格往初仁霑無外八紘受朔盡入封疆九譯承風遠遵文軌昆蟲涵於凱澤草木汎於榮光由是上感天而下漏泉不愛道而效其寶肇一元於

甲子致希世之貞符挾五始於長至播光前之茂禮伏見宣義郎李淳風表稱竊見古曆分日起於子半勘得今歲十二月甲子朔旦冬至而故太史令傅仁均欲苟異張曹玄法減餘稍多子初為朔遂差三刻用乖天正然初及日半月金末相離筭與太初事皆符合奉勅付有司及經術者詳加考定以議奏聞於是鴻生碩儒咸稽茂典研精覃思俱考曰文國子祭酒臣孔穎達十有一人與尚書八座參議得失咸以為仁均定朔事有微差淳風推校理尤精密謹按漢書云古者黃帝合而不死應劭云曆合天心而得僊也又按益部耆舊傳云洛下閎改顓頊法更作太初曆自云後八百歲此曆差一月當有聖人出定之斯乃差日盪觴久著之於冥兆聖出之驗耳當今之有徵俯會八百之期遠叶九僊之道臣等緬窅惟右歷考前王若乃萌氣黃鍾兆根玄牝闡其幽而藏其用窺其

奧而開其文列聖存而不論故無得而稱也自圖書爰始三統騰臆皇王以來六家分軫帝軒垂憲大撓洎其洪源伯禹嗣興小正窮其至贖命羲叔於唐曆考箕子於周年或以玄乙伺分翠虬定箭登清臺而索隱揆圭表以知微事緒多途無聞感應猶且各稱司契並擅鴻名改年號以應元符禮日觀而為稱首豈與夫兩儀同德五緯齊明景延南正星躔北陸編珠候朔的樂清漢之間合璧規天徘徊紫霄之上校先代之優劣豈同年而語哉庶當玉輅徐輪金泥祕檢塗山之下會百神而合符介丘之側朝萬玉而光輝天人交際不亦休歟臣等生屬壽昌累逢祉福至於今慶曠古無傳何幸如之親承旦暮不任欣躍之至

為汝南公賀元日御正殿受朝賀表

李商隱

臣某言臣得本州進奏院伏稱報元日皇帝陛下御含元

殿受朝賀者上正三辰下臨萬國事雖舉舊命則惟新臣某中賀臣聞聖祖垂訓王者處域中之尊公羊紀時春者為一歲之始載稽故實抑有典章近歲已來此禮多闕或事因惜費或時屬告休伏惟皇帝陛下道被無垠政敷有截全取發生之德無非訢合之仁蒼昊降符黃輿告瑞石碑既見文作太平銀甍旋臻字成萬歲而又憂勤不輟剋責方深精誠旁照於八紘懇惻上通於九廟仙厨撤味獸館休畋遂使化妖宿為壽星變小戎為餓殍慶由聖感令屬神行爰在新正或修闕典彤庭列位丹陛陳義凝旒而天啓其門服袞而日升於觀異風發越允澤滂沲左右寶臣駿奔多士國無諛佞擢靈草而不摧朝絕奸邪儼神羊而莫動禮成而退物有其容一作况以光耀瑤圖冊青玉輝前映後邁五登三臣竊訪碩儒遠徵舊典帝堯

華封之祝唯止匹夫神禹塗山之儀且非元會然猶堯有多憂之戒禹存一作後至之誅在和平而尚垂執歡呼之可致豈與茲日而得同年臣方守河潼正分符竹不獲躬陳玉帛首率梯航况又葺以藝文叨君禁密雖遠離天上猶近關西亦賀空深就望無所心馳紫闥非夢寐雷不運魂統皇闈羨歸飛而莫及無任賀恩壽祝戀闕屏營之至通

賀大衍曆表 玄宗

張說

臣說言伏以開元大衍曆天旨裁其紀綱日官考其精要履端更始敬授惟新加以辨五行之序推七精之數明銜聖期寶光土德臣又見梁天監中陶弘景著玉璽記云盛德木子以肇來運頃者僧一行推璿衡曆數既家天命成數千年古今祥兆若合符契曆數既在於聖躬卜年仍集作表於長曆莫大之慶獨冠前王臣忝跡儒林預聞昌運無

任林躍之至謹奉表陳賀以聞

賀示曆書表 玄宗

前人

臣某等言內侍尹鳳翔至奉宣聖旨內出新撰曆書二十五卷以示臣等窺深奧仰觀英華涉海登山固知攸際臣聞唐堯光宅順昊天而受四時時虞舜登庸在璿衡而齊七政伏惟開元聖文神武皇帝陛下至德廣運文明濟哲道冠生知與神合契備往聖之能事紹昔王之闕典發揮易象以應乘乾之時考正曆書更表履端之始上包二帝下括三王徵晷運之盈虛究推步之疎密備稽氣象載躔坎離一作離三辰順軌而更明五緯合度而增煥足使天地貞觀神人允諧唐虞舊章於斯重覩臣等幸陪書府得預朝聞林躍之情實萬恒品謹奉表陳賀以聞

代百寮賀放浙西租賦表

呂溫

臣某等言伏見今月十五日制命以天下經賦首於東南
浙右諸州荐罹災歉全已逋債大敷湛恩人譟勃興朝聽
震動中賀臣聞三王已降綿曠千祀為邦之政盡在欲理
之主甚衆莫不知傳戒獨豐語稱與足至於愛人節用之
際約躬紓國之時則必情隨事遷以故忘道故曰人鮮克
舉行之惟艱伏惟皇帝陛下濬發睿圖紹休聖緒躬行慈
儉之育困窮皇明燭幽惠訓不倦撫臨萬國曾未再周深
求疾苦之源屢下蠲除之詔裁戎祀之經費減乘輿之服
御雖邦計之有羨入憂於未憂雖生人之所樂輸損之又
損風行號令日貫精誠明神聽其德音和氣生於文字
將舟車所及咸升至理之期豈江湖下方獨被曲成之澤
臣等尸素有日獻納無聞尚勞聖心軫卹人隱甘同凡品
不敢望於清光竊與疲吐共謝生於玄造無任感抃
之至

為杜相公賀恩賜淮西粟帛表

符載

臣某言今月某日中使某官至伏知聖旨賜淮西節度使
吳少誠米若干石鹽若干緡若干疋雨露之潤忽沾於焦
早生育之德忽被於飢寒凡在臣庶孰不慶幸臣某誠觀
誠喜頓首頓首。者少誠迷誤興兵淮蔡陛下開日月之
耀霽雷霆之威洗其瑕穢復賜一作珪爵使螻蟻重安於
窟穴草木再浹於恩光大一作忠義易兇邪之心和平銷

悖亂之氣今復恤其歉儉賜之粟帛聖澤灑危疑之地皇
慈周反側之人合救時之宜塞未萌之釁微禽食榘尚懷
好音萬夫載恩豈不知感此所謂眷圖宏遠神武沉深善
戰於仁施之中伐謀於茫昧之際武何戈而不止物何化
而不從增七德之輝華動八紘之踴躍臣叨居將相職守

藩維不獲奔走稱慶宮闕無任觀抃懇疑之至謹奉表陳
賀以聞

中書門下賀柳情復膳表 常袞

臣某等言中使吳承倩至奉宣進止以臣等所奏華陽公
主初薨聖慈深悼柳情復膳保御至秋伏惟類表陛下初
以愛主幼冲純性聰敏類表思念之厚有過於人疾病之
憂非止於一日早齡遽失流痛兼哀臣等不安下情惶
灼上請微誠感達蒙降德音而不以至憂類表之私忘於
所寶之重推必然於大分割無益以遣懷用復常禮以勤
庶政此則陛下齊親踈於一致和福壽類表於萬邦契
眷類表祖玄元之符實天下蒼生之福臣等累日兢怖焦
心失圖承命釋憂倍百慰幸無任感悅之至謹奉表陳賀
以聞臣等誠惶頓首頓首

代李侍郎賀德政表 德宗 呂溫

臣某言臣聞上天垂象當分野者先知元后用心奉職司
者方見是以堯稱光被四岳得於疇咨舜號文明九官稟
其集命豈非隨方表志因事立言陳力自參於化源
造滕難述於日用伏惟皇帝階下眷圖濬發玄德廣運恢
纂鴻緒允升大猷振十聖之遺休復百王之墜典至如崇
陵盡瘁率禮無違長信歸尊因心則感內成則仁叙九族
外平則義協萬邦厚俗則寵及高年廣孝則榮加錫類能
刑則輔無隱集善任則野不集遺才修文則戎蠻來威
集王集整武則南北維捷此皆事懸集日月聲洽寰區黔
首之所謳歌播紳之所抃蹈集其或機參造物意兆先
天事隔於人謠功隱於朝聽者若非奉職之臣官業所及諒
而得而稱焉臣以庸劣謬膺寄任調盈虛而馭輕重關成

敗而繫安危職思其憂夕惕若厲每因整率披竭愚衷集作忠

亟奉溫顏累承眷旨有以知造化之意有以見天地之心

曠若發矇析一作新如愈疾管窺所至可得而言昨者臣

以潮州刺史李濬放縱私鹽耗散公利請從免職以儆

慢官陛下以為法令改更且一作且當申諭道塗悠遠客或

或未知俾為後圖用緩前責弘恕包於廣大明察貫於

精微此則羣臣不可望清光者一也江南西道觀察使

楊憑奏以支郎早歎經賦不充請征居地之美且修稅茶之

法陛下以為天災流行有時而息人怨滯結貽患則深縱

無日新之美忍復已除之弊特令寢奏姑務通商有司知

畫一之方負販有昭蘇之望此又羣臣不可望清光者二

也臣嘗使推官殿中侍御史崔太素奉使淮南臣以太素

二字集名秩甚卑濬災務重微令郡縣蠶集作訓役徒須

示等威請賜章服陛下以為職任伊始勤効未成必有可

觀乃申後命臣再陳所功方可其奏雖事從權與且符濟

物之宜而賞不僭行已見永圖之旨此又羣不臣可望清

光者三也臣對敷之日親奉德音知臣使司支計闕少必

擬昭明儉德振起素風率身為天下之先節用自宮中而

始又曰集作臺殿舊制已當場慮經營改作非所措懷將

不崇三尺之階豈復議十家之產發自宸念形于天顏意

開而河海自清言出而神祇知感此又羣臣不可望清光

者四也階下光臨大寶星歲將周貴戚之賜與無開恩倖

之濡濡殆絕至於贍軍供國行賞報功則必鴻毛府庫糞

土金玉遂使夏州諸將恨効淺而恩深劍外三軍知生輕

而義重此又羣臣不可望清光者五也夫唐虞盛烈文武

餘風莫不傳諸聲詩布在方冊且匹夫婦片善必書飛

羽沉鱗一祥皆紀况陛下動闕教化言在政刑理參至
道之精躬行盛德之事而冲虛謙讓鬱而未發將何以光
揚藝祖昭示後昆伏請宣付史官永為代法臣幸蒙恩遇
獲奉昌期言必親聞事皆目覩分深骨髓義激血誠輕黷
宸嚴魂宇集作首飛越無任屏營之至

文苑英華卷第五百七十

登仕郎胡柯

鄉貢進士彭叔夏

校正

